

# Mark Omasinahikan

---

## Capatis e tipatcimotc Cecoca kitci pe takociniritci

(Natawapata kaie Matt 3.1-12; Luc 3.1-18; Jean 1.19-28)

**1** <sup>1</sup>Ota kitciparin miro tipatcimowin, Cecoc Krist e arimomakaniwitc, Kice Manito Okosa.

<sup>2</sup>Weckatc ki masinatew masinahikan. Peikw iriniw ka ki masinahak, Ésaïe e icinikasospan. Nikan tipatcimokopan, ohweriw ka itasinahak:

«Itew Kice Manito:

‘Ki ka iciticohamatin peikw iriniw ke nta tipatcimotc nin otci, kirika ke ocitatc meskanariw kir otci.’ »

*Malachi 3.1*

---



*Jourdain sipi*



*Kwackwackotcihimanakecicak*

<sup>3</sup> «Kata pamatisiw neta askik  
ka ici cipearik e micta rekawonik.  
Kata tepitepwew kitci itetc:  
‘Nisawikw kitci pe takocik Teperitciketc!  
Ocitawakw meskanariw,  
tipickotc kitci iticimonik, taci ke pimotetc!’ »

*Ésaïe 40.3*

<sup>4</sup>Tapwe tca ki icinakon ani ka itemakak. Ki pe takocin iriniw. Capatis icinikasokopan. Pamatisikopan neta askik ka ici micta cipearik e micta rekawonik. Pa aicakopan e sikhatakespan kirika e aiarimwespan, e aitetc: «Kweskatisikw! Sihakatasokw! Ki ka kasihamakowaw Kice Manito kipactatowiniwaw!»

<sup>5</sup>Kaskina awik ka tacikespan neta askik Judée ka icinikaterik kirika neta Jérusalem otenak ki natawapamewok. Ekoni ka ici witakik tapwe e cikeritakik e ki patahakik.<sup>a</sup> Ki tca sikhatakowok Capatisa neta sipik Jourdain ka icinikaterik.

<sup>6</sup>Atikowaniw ko apatcitakopan anahwe Capatis, kirika pakekin pakotehona apatcihekopan. Kwackwackotcihimanakecica mowekopan ko, kirika amo namanasiriw mitcikopan ka ki miskakipan neta askik ka ici cipearik e micta rekawonik.

<sup>7</sup>Kaskina ka tacikewaspan ki itikowok anihi Capatisa: «Anahwe minawatc ke pe takocik nanake, kirawe mackoweritakosiw patok nin. Nin nama ni tipi miro iriniwin wawatc tepirak kitci nowectaian kitci ki apikonamowak omaskisin. <sup>8</sup>Nin ki ki

<sup>a</sup> 1.5 Kekotc: Ekoni ka ici kopesitcik opactatiwiniwaw.

sikahatatinawaw, nipi e ki apatcitaian. Aric wir ki ka sikahata-kowaw, Miro Manitowa kitci miritakw.»

### **Cecoc e sikahatasotc, minawatc e kokwetcihakaniwite**

*(Natawapata kaie Matt 3.13–4.11; Luc 3.21-22; 4.1-13)*

<sup>9</sup>Minawatc Cecoc ki pe takocin, Nazareth otenak e ki otci matcatc, Galilée askik itekera. Aci ki sikahatako anihi Capatisa neta Jourdain sipik. <sup>10</sup>Mia e iti kospitc Cecoc, ki wapatam mia e ceparinik oskoriw, kirika ki wapamew Miro Manitowa e pe racireritci wir otci, mia omemew e icinakosiritci. <sup>11</sup>Ki petam e itakaniwite, wakwek e otci petakonik: «Kir nikosis, ki micta sakihitin. Ki micta mireritamihin.»

<sup>12</sup>Tecikotc ki matcaw anahwe Cecoc, nete askik e icatc e ici cipearik e micta rekawonik, Miro Manitowa e ki iciticohokotc. <sup>13</sup>Ekota nete ka taciketc, nemitina tato kickwa irikik. Matci manitowa micta kokwetcihikopan. Ani irikik ka taciketc, notcimiw awesisa ki witci tacikemiko, kirika aceriwa ki pe nta atoskectako.

### **New iriniwok e wicamikotcik Cecoca kitci witcewatcik**

*(Natawapata kaie Matt 4.12-22; Luc 4.14-15; 5.1-11)*

<sup>14</sup>Minawatc ki kipohwakaniwiw Capatis. Ekoni tca ka ici matcatc Cecoc, nete e icatc Galilée askik e nta tipatcimotc Kice Manitowa Omiro Tipatcimowiniw. Aiarimwekopan ko e aitetc: <sup>15</sup>«Aci peco-nakoniw Kice Manito Okimawin! Kweskatisikw! Tapwetamokw Miro Tipatcimowin!»

<sup>16</sup>Mekwata nete e pimotespan Cecoc rarewak Galilée sakihikanik, aci ki wapamew nicw namesike iriniwa. Anahwe peikw, Simo<sup>b</sup> icinikasopan. Minawatc anihi ocima, Atre<sup>c</sup> icinikasoripan. Mekwata taci pakitohwapanak. <sup>17</sup>Aci itikowok Cecoca: «Pe witcewicikw! Ki ka witcihitinawaw kitci natcipahekok iriniwok kitci pe nosanehwitcik, tarasak names e natcipahekw e pakitohwaiekw!»<sup>d</sup>

<sup>18</sup>Tecikotc pakitinewok otaripiwawa e witcewatcik.

<sup>19</sup>Nakewara e pimotespan Cecoc, aci wapamew nicw kotakihi iriniwa, Cak<sup>e</sup> kirika ocima Jean, Zébédée anihi e niciritci okosa. Otcimaniwak apiwakopan aniki iriniwok. Taci wecihepanak

<sup>b</sup> 1.16 Simon

<sup>c</sup> 1.16 André

<sup>d</sup> 1.17 Mia itwaniwon: «Ki ka witcihitinawaw kitci kwackwepitekok kiwite iriniwawok!»

<sup>e</sup> 1.19 Jacques



*Cak kirika Jean e wecihatic otaripiwawa*

otaripiwawa. <sup>20</sup>Aci wicamikowok Cecoca. Tecikotc nakatewok otawiwawa kirika otirinimiwawa neta otcimaniwak, e iti witcewatic Cecoca.

### **Iriw e nekatcihikotc matci awihawica**

*(Natawapata kaie Luc 4.31-37)*

<sup>21</sup>Minawatic Cecoc kirika owitcewakana ki icawok otenak, Capernaüm ka icinikaterik. Aci e arwepiw kicikarik, Cecoc ki pitakew cota aiamihe mikiwamik e nta kiskinohamaket.


<sup>22</sup>Iriw neta ka ki petowatic micta mamiskasitowewakopan, micta pitoc e ici kiskinohamakeritci kirika tca anahweriw iriniwa ka kiskinohamakeritci cota aiamihe irakonikewiniw. Mictahi meka ki mackowisimakaniw otarimwewiniw.

<sup>23</sup>Mia pe pitakew iriniw neta cota aiamihe mikiwamik, matci awihawica e nekatcihikotc. Tepwew e itetc: <sup>24</sup>«Cecoc, Nazareth iriniw, kekwan ka pe nataweritamowiak? Ki pe nta nipahinan a? Ki kiskerimitin ni. Kir ka kitcitwawisiin, Kice Manito ka ki pe iciticohwisk.»

<sup>25</sup>Aci Cecoc kitotew anihi matci awihawica e itetc: «Aka kito! Ponihi anahwe iriniw!»

<sup>26</sup>E iti pakitinatc anihi iriniwa anahwe matci awihawic, pitama kiapatc micta opirikohew kirika micta notakohew. <sup>27</sup>Iriw neta ka tacikewaspan e apitc mamiskateritakik, kokwetcimitowok e itetcik: «Kekwan ni? Micta mackowisimakan ohwe ocki





*E tapwaticaniwok cota aiamihe mikiwamik*

kiskinohamakewin! Wawatc matci awihawica itew ke itotiskeritci anahwe iriniw kirika sapitako!»

<sup>28</sup>Minawatc ki micta kiciparin kaskina wiew e aiarimomakaniwite Cecoc Galilée askik itekera.

### **Mitcet e kikehatc ka akosiritci Cecoc**

*(Natawapata kaie Matt 8.14-17; Luc 4.38-41)*

<sup>29</sup>Minawatc ki matcawok neta cota aiamihe mikiwamik, nete e icatick Simo kirika Atre ka ici omikiwamiritci. Anahweriw kaie ki witcewikowok Cak kirika Jean. <sup>30</sup>Simo osikosa mackociniripan neta e kisiswapineritci. Ka pe takocik neta Cecoc, ki arimotamowakaniwiw anihi iskwewa. <sup>31</sup>Ki tca natawapamew. Ki otapiniskenew e pasikopitatc. Tecikotc ki matcamakaniw e kisiswapineritci. Aci anahwe iskwew ki nta atoskectowew anahweriw omantema e acamatc.

<sup>32</sup>Minawatc e iti otakocik, ka ickwa pakicimotc pisimw, mitcet akosikana ki iciwotowakaniwiw Cecoc, kirika mitcet ka ki pitci-teheckakoritci matci awihawiciruw. <sup>33</sup>Kaskina neta otenak ka taciketcik ki mawotcihitowok orowitimik ickwatemik neta mikiwamik. <sup>34</sup>Mitcet neta e tacitcik ki kikehikowok Cecoca, papitoc



*Cecoc e kikehatc ka akosiritci*

e ki itapinetcik kaie mitcet omatci awihawicimiwawa e ki orowitica hamowakaniwiticik. Nama kaie ki otci pakitinew Cecoc anahweriw matci awihawica ka ki matceticohwakaniwiritci kitci kitoritci. Kiskerimikopan meka.

### **E pa icatc Cecoc nta Galilée askik**

*(Natawapata kaie Luc 4.42-44)*

<sup>35</sup>Minawatc micta wipatc kecepawonik, kiapatc tipiskarikopan. Cecoc ki onickaw. Ki matcaw neta mikiwamik. Ki orowiw nta otenak, wic nte ki icaw aka ka ici taniwonik, aka e peconakonik otenaciciriw. Ekotca ka ici aiamihatc. <sup>36</sup>Aci Simo kirika atita iriniwa ka ki pe witcewaspan ki matcawok e nta nantowapamatcic Cecoca. <sup>37</sup>Ka ickwa miskowatcic ki itewok: «Kaskina awik ki nantowapamikw.»

<sup>38</sup>Itew Cecoc: «Matcatan. Nete kaie kotakihi otenacik pecotcic ka ici takoki ki ka icanano. Ni ka nta kakeskwan. Ekoni meka wetci ki pe icaian ota askik.»

<sup>39</sup>Minawatc kaskina e irikokwarik ki pa aicaw neta Galilée askik. Mitcet cota aiamihe mikiwamik ki pa kakeskwew kirika ki orowiticohwew matci awihawica.

### **Cecoc e kikehatc iriniwa ka omikiwapineritci**

*(Natawapata kaie Matt 8.1-4; Luc 5.12-16)*

<sup>40</sup>Peikwaw e kicikarik Cecoc ki pe natawapamiko iriniwa ka omikiwapineritci. Pe natcikapowictako e pakoserimikotc kitci witcihatc, e itikotc: «Kecpin naheritamane, ki kackitan kitci kikehiin.»



*Ka niponesitc e nitapikenakaniwitc, kitci ki kikehikotc Cecoca*

<sup>41</sup>Ki micta kitimakerimew Cecoc. Otapiniskew e takinatc e tca itatc: «Nit ici naheriten. Aci ki kikan!»

<sup>42</sup>Tecikotc matcamakaniw otakosiwin anahwe iriniw. Ekoni e kiketc. <sup>43</sup>Minawatc kaketin aimihiko Cecoca, tecikotc e kiweti-cohokotc, <sup>44</sup>e itikotc: «Natotaci. Aka awik witamo aniheriw ka ki isparinik. Aric cota mekotewokorew ki ka nta wapatahaw aci e kikein. Minawatc tca nta pakitinikekan, kotc Moïse ka ki ici kiskinohamatokw, kitci ki wapatahiwein aci e kikein.»

<sup>45</sup>Ki tca matcaw anahwe iriniw, aric kaskina wiew e pa tipatci-motc aniheriw ka ki iciwepasitc. Ekoni wetci arimanikopanen otenak e wi pitaketc Cecoc. Aric nakewara nete otenak pe pa aitacikekupan nete aka e ici taniwonik. Peikon kaskina wiew ototaniwonikopan e pe natawapamakaniwitc.

### **Cecoc e kikehatc iriniwa ka niponesiritci**

*(Natawapata kaie Matt 9.1-8; Luc 5.17-26)*

**2** <sup>1</sup>Minawatc nikotin e kicikarik ki pe kiwew Cecoc neta otenak Capernaüm ka icinikaterik. Aci ki petakaniwoniw e ki pe kiwetc. <sup>2</sup>Ki micta tca icaniwoniw neta mikiwamik ka ici taciketc. Ki iti micta mitcetinaniwoniw, nac e apitc sitcikapowinaniwonik, mitcet orowitimik nanipowiwok. Ekoni e ici kiskinohamaketc Cecoc.



<sup>3</sup>Aci atita iriniwok pe takocinok e pecowatcik peikw iriniwa e niponesiritci, Cecoca e wi iciwotowatcik. Pe newiwok e pe takonakik tetaskonikaniw, ite e ici miciniritci anihi ka niponesiritci. <sup>4</sup>Nama aric ki iciworewok pecotcik ka icikapowiritci Cecoca, osam e micta mitcetiniwoniw. Ki tca iciworewok okitc mikiwamik.<sup>f</sup> Minawatc ki pokonehamok okitc ite e ici apiritci Cecoca. Ekota ka otci nitapikenatcik anihi ka niponesiritci, otetaskonikanik e miciniritci, cectokwapiriw e ki apatcitatcik. <sup>5</sup>Kiskeritam Cecoc e apitc asperimototakotc anahweriw iriniwa ka pe nitapikenamiritci aniheriw tetaskonikaniw. Aci itew anihi ka niponesiritci: «Nikosis, ki kasihamakowin kipactatowina.»

<sup>6</sup>Apipanak neta atita ka kiskinohamaketcik cota aiamihe irakoni-kewiniw. Iteritamowakopan: <sup>7</sup>«Ceckwat ani ici arimwew anahwe iriniw! Marerimew Kice Manitowa! Nama meka taw awik ka kackitatc e kasihamaketc pactatowiniw, wir tepirak Kice Manito!»

<sup>8</sup>Tecikotc kiskeritam Cecoc ani e iteritamiritci. Aci itew: <sup>9</sup>«Kekwan wetci iteritamekw anihe? Kit iteritenawaw a, kirawe kata wetanipan kitci itakaniwitc anahwe ka niponesitc e kasihamowakaniwitc opactatowin, patok kitci itakaniwitc ‘Pasiko, otapina kitetaskonikan, pimote tca’? <sup>10</sup>Actew aric ohwe kitci kiskeritamekw, Iriniw Okosa e ki mirakaniwitc peikon kitci kasihak pactatowiniw ota askik.»<sup>8</sup>

Aci itew anihi ka niponesiritci: <sup>11</sup>«Ki witamatin, pasiko! Otapina anihe kitetaskonikan! Kiwe nete kimikiwamik!» <sup>12</sup>Tecikotc pasiko anahwe iriniw. Otapinam otetaskonikan e iti pimotetc. Kaskina awik kanawapamewok. Micta mamiskateritamok. Mirwatcimewok Kice Manitowa e itetcik: «Pitcerak ni wapatenan ani e isparik!»

### **Lévi e wicamikotc Cecoca kitci nosanehwatc**

*(Natawapata kaie Matt 9.9-13; Luc 5.27-32)*

<sup>13</sup>Kiapatc minawatc Cecoc ki iti icaw rarewak sakihikanik, Galilée ka icinikaterik. Micta mitcetiriwa iriniwa ka pe natawapamikotc. Ekoni e ici kiskinohamaketc. <sup>14</sup>E iti pimotetc, wapamew peikw iriniwa. Lévi icinikasoriw, Alphée anihi okosa. Nte taci apiripan ite ka ici kicikasonaniwoniw e mawotciticikaniwoniw kice okimaw otci. Aci itew Cecoc: «Pe nosanehoci.» Ekoni ka ici pasikotc anahwe Lévi e tca nosanehwatc.

<sup>f</sup> 2.4 Ani apitc pitoc icipokwaterikopan omikiwamiwaw. Ki takwariw. Iskawatowakaniw apatcitawakopan kitci ki iskawatowitcik neta okitapokw.

<sup>g</sup> 2.10 Arimomitiso ota Cecoc.



<sup>15</sup>Minawatc ki nta mitciso Cecoc Lévi omikiwamik. Mitcet ki pe icawok kaie wirawaw kitci witci mitcisomatick Cecoca kirika owitcewakana: mawotcitcike iriniwok kaie kotakihik aka orina ka kicterimakaniwiticik. Mitcetipanak meka iriniwok ani ka ici matisiticik e nosanehwatick Cecoca. <sup>16</sup>Irinwok ka kiskinohamatick cota aiamihe irakonikewiniw, Pharisiens e ici apiticik,<sup>h</sup> wapatamowakopan aniheriw e isparinik. Ki wapamewok Cecoca e witci mitcisomaritci anihi towiriw iriniriw. Aci itewok Cecoca owitcewakaniw: «Kekwariw wetci witci mitcisomatick mawotcitcike iriniwa kaie anihi kotakihi iriniwa aka ka kicterimakaniwiritci?»

<sup>17</sup>Ki petam aniheriw Cecoc. Minawatc ki itew: «Irinwok ka miro matisiticik nama arimatick mackiki iriniwa natawapamewok. Patoc ka akositcik iriniwok acteriw mackiki iriniwa kitci natawapamatick. Nama ni ki otci pe ican kitci wicamakik aniki aci icikowisk ka iteritakositcik kitci witcewiticik, aric kirawe aniki ka pactatiticik.»

### **Roskosowiniw e arimotak Cecoc**

*(Natawapata kaie Matt 9.14-17; Luc 5.33-39)*

<sup>18</sup>Peikwaw e kicikarik Capatis owitcewakana kirika Pharisien iriniwok roskosopanak. Aci atita iriniwok ki natawapamewok Cecoca e kokwetcimatick: «Capatis owitcewakana kirika Pharisien iriniwok owitcewakaniwawa roskosoriwa. Kekwariw tca wetci aka totakik kir kiwitcewakanak?»


<sup>19</sup>Itikowok Cecoca: «Kecpin e ickwa nipowinaniwok, mocak makocaniwon. Anahwe ka nipowitc wicamew okwimesa kitci pe nta witci mitcisomikotc. Kit iteritenawaw a, aniki ka wicamakaniwiticik kata roskosowok mekwata kiapatc e tacikeritci anihi okwimesiwawa ka nipowiritci? Nama ketcinatc! <sup>20</sup>Kecko aric kata maninamowakaniwiwok anihi ka nipowiritci. Ani tca isparike, aci nta kata wi roskosowok.»

<sup>21</sup>Minawatc kiapatc itew Cecoc: «Kecpin awik e iteritak kitci pokohak kete wikasiriw, nama nte ocki pakiwaniciriw kata totam, aka moci e ki otci otekapwearik. Kecpin aniheriw actate, minawatc kisisipatate owikasim, aniheriw pokonehikaniw kata manipariniw. Kirawe tca kata iti micariw neta e pikockak.»

<sup>22</sup>«Nama kaie awik kete omackimotewanik ka pakekiniwonik kata sikinam ocki minicaporiw anotciwetc e ki ocitatic, osam

---

<sup>h</sup> 2.16 Pharisien iriniwok ka icinikatakaniwiticik, enko aniki ka tapweritamowakopan otcitakotc kaskina cota aiamihe irakonikewiniw kitci nosanetakaniwonik, kitci ki mirerimitokw Kice Manito. Micta aiamihatisiwakopan cota aiamihewinik itekera.



*Mackimotewan ka pakekiniwok*

meka anihe ocki minicapo kiapatc kata otamirohomakan e ocihomakak. Kata packiparin anihe kete mackimotewan. E niciki tca kata onactakaniwono, minicapo kaie mackimotewan. Actew ocki mackimotewanik kitci actakaniwok ocki minicapo.»

### **E arwepiw kicikarik e arimotak Cecoc**


*(Natawapata kaie Matt 12.1-8; Luc 6.1-5)*

<sup>23</sup>Peikwaw e arwepiw kicikarik, Cecoc kirika owitcewakana acockamopanak kitikan askiriw. Aci owitcewakana iti mawotciheriwa mirominockwa ka nitawikinik neta, mekwata e pimetetcik neta kitikan askik.

<sup>24</sup>Aci Pharisien iriniwok itewok: «Kanawapata! Kekwariw wetci totakik aniheriw kiwitcewakanak? Masinatew meka kitaiamihe irakonikewininak aka ani kitci totcikatek e mekwa arwepiw kicikak.»

<sup>25</sup>Itew Cecoc: «Nama ni wiskat ki ki otci tapwatanawaw anihe ka masinatek? Weckatc peikwaw e kicikarik okimaw Tapit<sup>i</sup> arimisi-kopan, e pakatewakopanen kirika otirinima. <sup>26</sup>Aiamihe mikiwamik ki pitakew. Ki mowew neta pakwecikana ka ki aiamihe pakitina-kaniwiritci Kice Manitowa otci. Abiatar icinikasopan ka kice cota mekotewokorewispan ani apitc. Masinatew kitirakonikewininak, acteriw tepirak mekotewokorewok kitci mowatcik anihi pakwecikana. Aric Tapit ki otapinew. Ki mamirew anahweriw otirinima.»

<sup>27</sup>Kiapatc itew Cecoc: «Ki ocitakaniwon kitci arwepiw kicikak iriniw otci. Nama aric ki otci ocihakaniwiw iriniw arwepiw



Cota aiamihe mikiwam

kicikariw kitci tiperimikotc. <sup>28</sup>Ekoni wetci iteian, Iriniw Okosa wir ka tiperitak wawatc e arwepiw kicikarik.»<sup>j</sup>

### E kikehakaniwitec iriniw e arwepiw kicikarik

(Natawapata kaie Matt 12.9-14; Luc 6.6-11)

**3** <sup>1</sup>Minawatc iti pitakew Cecoc cota aiamihe mikiwamik. Arwepiw kicikarikopan. Iriniw ka niponesitc otcitcik taci tacikepan neta. <sup>2</sup>Kotakihik iriniwok neta ka tacikewaspan nanakatcihepanak wewerita Cecoca ke apitc kikeharitci anihi iriniwa mekwata e arwepiw kicikarik, osam e wi itactahoratcik.<sup>k</sup> <sup>3</sup>Itew Cecoc anihi iriniwa ka niponesiritci otcitcirik: «Pasiko, kaskina awik kitci wapamisk.»


<sup>4</sup>Minawatc ki kokwetcimew Cecoc anahweriw ka taci kanawapakeritci e itatc: «Tan e ici nataweritakok kitirakonikewininak? Kitci miro totowakaniwitec iriniw e arwepiw kicikarik kekotc ma kitci matci totowakaniwitec? Kitci natokohakaniwitec e akositc, kekotc ma kitci pakiterimakaniwitec kitci nipotc?»

Nama aric ki otci kitowok. <sup>5</sup>Micta kiciw kanawapamew Cecoc anahweriw neta ka tacikeritci kirika micta kice kackeritamokopan, osam tekaci aka e wi nisitotamiritci. Aci itew anihi iriniwa ka niponesiritci: «Pe itina kitcitci.»

Itinam otcitci anahwe iriniw. Ekoni e ici iti kiketc. <sup>6</sup>Ki orowiwok Pharisien iriniwok neta cota aiamihe mikiwamik e tca mawotcihi-totcik kirika kotakihik iriniwok ka atoskectowatcik kice okimawa

<sup>j</sup> 2.28 Arimomitiso ota Cecoc.

<sup>k</sup> 3.2 Itacteriw neta otaiamihe irakonikewiniwak cota iriniwok tekaci aka kitci otamironaniwonik e arwepiw kicikarik.



*E kiskinohamaketc Cecoc, tcimanik e apite*

Hérode ka icinikasoritci, e arimotakik tan ke ki totakik kitci ki nipahakaniwiritci Cecoca.

### **Micta mitcet iriniwok e pe natawapamatcik Cecoca**

<sup>7</sup>Cecoc iti matcawok kirika owitcewakana, neta rarewak Galilée sakihihikanik e icatcik. Micta mitcet iriniwa iti nosanehokowok. Atita Galilée askik ototepanak, kaie Judée askik. <sup>8</sup>Kotakihik Jérusalem otenak ototewakopan, kirika Idumée askik, kirika kotak askik akam sipik Jourdain ka ici takonik. Ekote atita ototewakopan, kaie nete kotakihi askik pecotcik ka ici takonik otenariw Tyr kaie Sidon ka icinikaterik. Wetci pe natawapamatcik Cecoca aniki micta mitcet iriniwok, osam e ki petaketcik e ici mata kackitaritci.

<sup>9</sup>Aci itew Cecoc owitcewakana kitci natcipatamakotc tcimaniw aka kitci cakockahikotc anihi micta mitcet iriniwa. <sup>10</sup>Osam mitcetiriwa e ki kikehatc ka akosiritci. Kaskina tca kotakihik papitoc ka itapinetcik wi kotci natcikapowickowewok Cecoca e wi pecowapamatcik, e wi takinatcik kitci ki kikehikotcik kaie wirawaw. <sup>11</sup>Kirika kotc ko e wapamikospan Cecoc matci awihawica, nipiskoparihoriwa pecotcik nte ositik e tca iteritci e tepitepweritci: «Kir Kice Manito Okosa!»

<sup>12</sup>Aric Cecoc kaketin ki witamowew aka kitci witamiritci aniheriw e iteritakositc.

### **E orapamatc otarotakana Cecoc**

*(Natawapata kaie Matt 10.1-4; Luc 6.12-16)*

<sup>13</sup>Minawatc Cecoc ki amatciwew matinacik. Aci wicamew iriniwa ka ki orapamatc. Tato nta e tacitcik ki pe natcikapowictako. <sup>14</sup>Mitato acitc nicw ki orapamew, «nitarotakanak»



e icinikatatc.<sup>l</sup> Ki orapamew anahweriw kitci ki pa witcewikotc kirika kitci iciticohwatc kitci pa tipatatamiritci Miro Tipatcimowiniw, <sup>15</sup>kaie ki mamirew tiperitamowiniw kitci orowiticohwaritci matci awihawiciriw.

<sup>16</sup>Enko oki mitato acitc nicw iriniwok ka ki orapamakaniwiticik: Simo (kotakeriw icinikasowiniw ki miriko Cecoca, Pien ki icinikatiko). <sup>17</sup>Minawatc Cak acitc ocima, Jean ka icinikasoritci, Zébédée anihi okosa e niciritci. (Kaie wirawaw ki mirikowok Cecoca kotakeriw icinikasowiniw. Boanergès ki icinikatikowok. Wi itemakan anihe icinikasowin: «Irinwok mia onimiskiw ka asiteritakositcik».)

<sup>18</sup>Minawatc Atre, Pirip,<sup>m</sup> Barthélemy, Matio,<sup>n</sup> Toma,<sup>o</sup> Cak (Alphée anihi okosa), Thaddée, Simo («Anahwe aka ka naheritak kitci tiperimikotc kice okimawa» ka icinikatakaniwitic),<sup>p</sup> <sup>19</sup>acitc Judas Iscariote, anahwe ke pakiterimatc Cecoca.<sup>q</sup>

### **Cecoc e wi matceworikotc otcirowemakana**

<sup>20</sup>Minawatc ki pe kiwew mikiwamik. Pe micta mitcetinaniwoniw neta. E apitc mitcetinaniwonik, nama wawatc ki mitcisowok Cecoc kirika owitcewakana. <sup>21</sup>Ka petakeritci atita otcirowemakana Cecoc, ki pe matcawok e wi pe natcipahaticik kirika e aitetcik: «Nama aci waskamatisiw!»

### **E naskamotc Cecoc e ici itactahorakaniwitic**

*(Natawapata kaie Matt 12.22-32; Luc 11.14-23; 12.10)*

<sup>22</sup>Ka kiskinohamaketcik cota aiamihe irakonikewiniw Jérusalem otenak ki otci pe matcawok e pe icaticik neta Cecoca ka ici tacikeritci. Ki aiarimomewok e tca itaticik: «Matci manito, 'Béelzébul' e icinikasotc, enko anaha ka ki pitcitechekowatc Cecoca!»

Kotakihik aitepanak: «Anahwe ka tiperimatc matci awihawica, enko anaha ka miratc Cecoca aniheriw otiperitamowiniw kitci ki orowiticohwaritci matci awihawiciriw!»

<sup>23</sup>Aci Cecoc wicamew anahweriw ka ki aiteritci e tca aimihatc, atisokaniciciriw e apatcitatc, e itetc: «Tan ke ki totak matci

---

<sup>l</sup> 3.14 Kekotc: onapotema

<sup>m</sup> 3.18 Philippe

<sup>n</sup> 3.18 Matthieu

<sup>o</sup> 3.18 Thomas

<sup>p</sup> 3.18 Mia itemakan e emitikocictek: Simon le nationaliste; Nama ki otci mireritamotake anahwe Simo cota iriniwok kitci tiperimikotcik Romain kice okimawa.

<sup>q</sup> 3.19 Kekotc: ke wecimatc, ke atawetc

manito Satan ka icinikasotc kitci ki orowiticohotisotc?<sup>r</sup> <sup>24</sup>Kecpin e matciparihitotcik iriniwok peikw okimawinik ka taciketcik e macikotatotcik, nama kinec kata takon anihe okimawin.

<sup>25</sup>Peikon kaie kecpin ka tcirowemitotcik macikotatotawe, nama kinec aci kaie wirawaw kata niciwonatcihitisowok. <sup>26</sup>Peikon tca kaie wir matci manito, kecpin e matciparihitoritci anahweriw ka atoskectakotc, kecpin kaie e papikaniparinik e tiperitak, nama kinec kata tiperitam. Otcitakotc kata ickwapariniw otiperitamowin.»

<sup>27</sup>«Nama awik kata ki pitakew omikiwamirik iriniwa ka micta mitcewokisiritci, kitci tca matcewotatc e ici tatamiritci, patoc kata takopitew. Aci neta kaskina kata ki matcewotaw ka ici takonik neta mikiwamirik.»

<sup>28</sup>«Tapwe ohwe ka tipatataman: Kaskina kata ki kasiamowakaniwiwok opactatowiniwaw iriniwok, kaie kaskina ka ki ici mareritciketcik. <sup>29</sup>Aric anahwe ke marerimatc Miro Manitowa nama wiskat kata kasiamowakaniwiw. Nespitc kata kanaweritam aniheriw opactatowin.»

<sup>30</sup>Wetci ici aiarimwekopenen Cecoc e aimihatc anahweriw iriniwa, osam e ki itetcik: «Matci awihawic ka ki pitciteheckowatc Cecoca.»

### **Cecoc okawiwa kirika ocima**

*(Natawapata kaie Matt 12.46-50; Luc 8.19-21)*

<sup>31</sup>Aci pe takocinok Cecoc okawiwa kirika ocima. Nakewara mikiwamik taci nanipowiwok. Ki tca iciticohwewok peikw iriniwa kitci nta wicamaritci Cecociriw. <sup>32</sup>Ani apitc micta mitce-tinaniwonipan e waskapinaniwonik neta ka ici apitc Cecoc. Aci itakaniwiw: «Kikawi kirika kicimak ki taci pehikok orowitimik neta. Ki natawerimikok.»

<sup>33</sup>Aci itew Cecoc: «Awin na nikawi? Kaie awiniki nicimak?»

<sup>34</sup>Minawatc kanawapamew neta iriniwa ka waskapiritci neta ka ici apitc e tca itatc: «Kanawapatamokw! Nikawi kirika nicimak tacikewok ota! <sup>35</sup>Kaskina meka awik ka aitotisketc e ici nataweritamiritci Kice Manitowa, enko na nicim kekotc nikawi.»

---

<sup>r</sup> 3.23 Pot wi itemakanotake ohwe: «Awik ka atoskectowatc matci manitowa nama kata matceticohwepan.»




*E matce kitiketc iriniw*

### **Atisokanicic: Kitike iriniw**

*(Natawapata kaie Matt 13.1-9; Luc 8.4-8)*

**4** <sup>1</sup>Minawatc kiapatc taci kiskinohamakew Cecoc rarewak Galilée Sakihikanik. Micta mitcetiriwa iriniwa ka pe natawapamikotc neta waska ka ici taciketc. E apitc mitcetiritci, ki nta posiw tcimanik. Ekoni ka ici apitc. Akotanopan anihe tciman, aniki tca iriniwok rarewak tacikepanak. <sup>2</sup>Kiskinohamakepan Cecoc, mitcet atisokaniciciriw e apatcitatc. Aci itepan: <sup>3</sup>«Natotamokw ohwe! Peikwaw iriniw ki icaw okitikan askik e nta matce kitiketc. <sup>4</sup>Mekwata e kitiketc, atita okitikanicica ki papakitiniw meskanacik. Kek pirecicak petcirewok, e mockatakik kaskina aniheriw kitikaniciciriw. <sup>5</sup>Minawatc kotakeriw okitikanicica e ici asiniskarik ki ici pakitiniw, aka tapwe e takonik askiriw. Nama kinec aci orina matcekin, aka e tipi kispakak anihe aski. <sup>6</sup>E micta ocpikotcik pisimw, aci ickwatewa anihi kitikana, osam aka e kinwapekisiritci otapiwawa. Tekaci pactewa.»

<sup>7</sup>«Kiapatc kotakeriw okitikanicica nte ki ici papakitiniw minesikaci e ici nitawikik. Anihi minesikacia nipatcikemakano, ekoni aka e ki otci mirokiki anihi kitikanicica. Nama tca kekocic



Kiackok

ki otci nitawikin. <sup>8</sup>Atita aric kitikanicic nte ki ici papakitin miro askik ka pimitewok. Aci nta micta mirokin. E apitc ki mirokik, atita nicto mitina (30) ki nitawikin kitikan, atita kaie nikotwaso mitina (60), kotakihi tca mitato mitina (100).»

<sup>9</sup>Kek itew Cecoc: «Wewerita natotamokw ohwe, kirawaw ka kackitaiekw kitci nisitotamekw!»<sup>s</sup>

### **Wetci apatcitatc atisokaniciciriw e kiskinohamaketc Cecoc**

*(Natawapata kaie Matt 13.10-17; Luc 8.9-10)*

<sup>10</sup>Minawatc warawik ka iti aitatc Cecoc, aka awocamec e peco-wapamikotc anihi mitcet iriniwa, aci kokwetcimiko anahweriw iriniwa ka pa witcewikotc ko kirika anihi owitcewakana e mitato acitc niciritci, e kokwetcimikotc kekwariw ka wi itetc ka ki atisoketc.

<sup>11</sup>Aci itew Cecoc: «Kirawaw aci ki ki mirikowinawaw kitci nisitotamekw tan e asiteritakonik Kice Manito Okimawin, anihe aka ka ki otci kiskeritakonikipan. Aric kitci ki iciwepanik aniheriw ka ki masinahikaterik neta Kice Manito Omasinahikanik, kotakihik iriniwok petamok aniheriw tepirak kecpin atisokaniciciriw e apatanik e kiskinohamakaniwonik, <sup>12</sup>ekoni tca kitci iciwepanik:

‘Kanawapatamok iriniwok,  
nama aric tapwe wewerita wapatamok;  
Petamok, nama aric nisitotamok;  
Kecpin meka tapwe ki nisitotakik  
kata kweski natawapamepanak Kice Manitowa.  
Kata kasihamakopanak.’»

*Ésaïe 6.9-10*

---

<sup>s</sup> 4.9 Mia itemakan: «Wewerita natotamokw, kecpin takonokwen kitokawaw.»



## Wewerita e witak Cecoc wa itemakanik otatisokanicic

(Natawapata kaie Matt 13.18-23; Luc 8.11-15)

<sup>13</sup>Minawatec itew Cecoc: «Nama ani ki ki otci nisitotenawaw anihe atisokanicic ka ki kiskinohamakewakeian? Tan nte tca ke ki otci nisitotamekw anihi kotakihi nitatisokana?»

<sup>14</sup>«Anahwe kitike iriniw e atisokatakaniwitc, tarasak awik e kiti-ketc Kice Manitowa otitewiniw,<sup>t</sup> e tipatatak aniheriw. <sup>15</sup>Atita iriniwok icinakosiwok mia kitikanicic ka ki pakitik pecotcik meskanacik. Ki petamok Kice Manitowa otitewiniw, aric tecikotc matci manito pe nta maninamowew aniheriw ka ki kitikaniwonik otehiwak.»

<sup>16</sup>«Minawatec kotakihik iriniwok icinakosiwok mia kitikanicic ka ki pakitik e ici asiniskarik. Petamok Kice Manitowa otitewiniw. Tecikotc mireritamok e petakik. Wi tapweritamok. <sup>17</sup>Nama aric orina kinec kanaweritamok. Mamacic tepirak tapwetamok. Onikatamok ka ici tapwetakik mekwata e arimihakaniwitcik kekotc e nekatcihakaniwitcik Kice Manitowa otitewiniw otci.»

<sup>18</sup>«Kiapatc kotakihik iriniwok icinakosiwok mia kitikanicica e ki pakitiki minesikaci ka ici takok. Ki petamok Kice Manitowa otitewiniw, <sup>19</sup>nama aric wi pamitamok, osam e arimeritakik aniheriw ka aisparinik opimatisiwiniwak, kekotc coriarw sakitawok e wi micikitatcik, e iteritakik aniheriw kitci mireritamihikotcik, kaie mitceniw kotakeriw ka ici nataweritakik. Nipatawok aniheriw Kice Manito otitewiniw ka ki iti matcekinikipan otehiwak. Nama tca mirokiwok aniki iriniwok otcitcakociwak itekera.»

<sup>20</sup>«Minawatec mamitec itew Cecoc: «Kecpin awik e ickwa iskahak wactenamakaniw,<sup>v</sup> kata akonakwenam a, askikwa kitci totowatec?»<sup>u</sup>

## Atisokanicic: Wactenamakan


(Natawapata kaie Luc 8.16-18)

<sup>21</sup>Minawatec ohweriw itew Cecoc: «Kecpin awik e ickwa iskahak wactenamakaniw,<sup>v</sup> kata akonakwenam a, askikwa kitci totowatec?»

<sup>t</sup> 4.14 Kekotc: otarimwewiniw

<sup>u</sup> 4.20 Mia itemakan: «Micta mirokino mitcet kitikana, atita nicto mitina (30), atita kaie nikotwaso mitina (60), minawatec atita mitato mitina (100) nitawikino miro kitikana.

<sup>v</sup> 4.21 Kekotc: waskorenitamakaniw

*Wactenamakan*

Kekotc ma cipa nipakanatikok kitci actatc? Nama ketcinatc! Kirawe kata actaw ka ici tcimatakaniwonik wactenamakaniw. <sup>22</sup>Kaskina ka ki katakaniwok kata nokotakaniwon, kaie kata miro kiskeritakon kaskina kekocic aka ka ki otci kiskeritcikatek. <sup>23</sup>Wewerita natotamokw ohwe, kirawaw ka kackitaiekw kitci nisitotamekw!»<sup>w</sup>

<sup>24</sup>Kiapatc itew Cecoc: «Kaketin aiekwamisikw e ici petamekw: Kice Manito kata tipaham irikik ke mirikoiekw, mitowi kirawaw ka asitci tipahamekw e mirekw kiwitc iriniwaw. Aric Kice Manito kirawe nipara wir kata actaw. <sup>25</sup>Anahwe meka nipara ka ki cawerimakaniwitc, awocamec kata mirakaniwiw, kecpin mirwapatcitatie. Aric anahwe memantcic tepirak ka ki cawerimakaniwitc, aka e mirwapatcitatie, kaskina aniheriw ka ici tatak kata maninamowakaniwiw, misawatc aka nipara e ici tatak.»

### **Atisokanicic: Kitikan wircike ka matcekik**

<sup>26</sup>Aci Cecoc itew: «Ekoni e icinakonik Kice Manito Okimawin: mia iriniw e matce kitiketc okitikan askik. Minawatc nama arimatc awocamec kata pameritam aniheriw okitikan. <sup>27</sup>Ekoni e ici nipatc tato tipiskwa, kaie onickaw tato kickwa. Peikon tca nitawikiniw kaie matcekiniw, misawatc aka e kiskeritak tan wetci isparinik. <sup>28</sup>Nিকে matcekin anihe kitikan neta askik. Nictam nitawikin, minawatc iti nipiciwon, nac kitci ki mawotcitakaniwok.

<sup>w</sup> 4.23 Mia itemakan: «Wewerita natotamokw, kecpin takonokwen kitokawaw.»

<sup>29</sup>E ickwa kicinitawikinik, aci kata kickicam anahwe iriniw, mackoci mokomaniw e totak, aci kitci mawotcitakaniwonik.»



*Iriniw e nta kickicak okitikan, mackoci mokomaniw kitci totak*

### **Atisokanicic: Rimotat kitikanicic**

*(Natawapata kaie Matt 13.31-32,34; Luc 13.18-19)*

<sup>30</sup>Minawatc itew Cecoc: «Tan e icinakonik Kice Manito Okimawin? Tan ke ki ici atisokeian kitci ki arimotamokw?

<sup>31</sup>Mitowi e isparik kitikanicic rimotat ka icinikatekatek askik e kitikaniwok. Mawotci anihe apicacin patok kaskina kotakihi kitikanicica ka takoki. <sup>32</sup>Aric e ickwa matce kitikaniwok, minawatc e kicinitawikik, enko ni ka mawotci kinwaskok neta kitikan askik, nac e apitc micarik otikon, matci kitci ki pe nta ocitatcik pirecicak otcictoniwaw neta e akwactewarik.»

<sup>33</sup>Ekoni mocak e ici kiskinohamakespan Cecoc. Aniheriw towiruw atisokaniciciruw apatcitakopan ko e mitcenik, kotc ke ki ici nisitotamiritci iriniwa ka ki pe nta natotakeritci. <sup>34</sup>Nama otci kiskinohamakekohan patoc ko aniheriw e apatcitatc atisokaniciciruw. Aric wircike e tacikespan kirika owitcewakana, aci nta wewerita witamowepan wa itemakanik.



*Cecoc e nakahak e micta rotinik*

### **Cecoc e nakahak e micta rotinik**

*(Natawapata kaie Matt 8.23-27; Luc 8.22-25)*

<sup>35</sup>Anihi peikon ka ki mi kicikarik e iti otakocinik, aci itew Cecoc anahweriw owitcewakana: «Aci ki ka acohenano.»

<sup>36</sup>Minawatc matcawok. Ki nakatewok e micta mitcetiritci iriniwa nte. Tcimanik ki nta apikopan Cecoc. Ki posiriwa owitcewakana kaie wirawaw. Matcehowok, Cecoca e matceworatcik. Mitcetotaki-sipanak kotakihik iriniwok pecotcik e acohakik kaie wirawaw.

<sup>37</sup>Kek keskat micta rotiniw. Sisikahoteriw otcimaniwaw osam e micta mitcahanik, aci kaie kekat mockineperiw. <sup>38</sup>Mekwata nipapan Cecoc otaketakok tcimanik, apikwecimonik e apikwecimotc. Aci kockoniko owitcewakana e tca itikotc: «Okimaw,<sup>x</sup> aci ki ka kwapawanano! Nama a wiew kit iteriten kir?»


<sup>39</sup>Aci onickaw Cecoc. Kaketin arimwew e nakahak e rotinik kirika e aimitatc sakihikaniw e mitcahanik, e itetc: «Pekatc nte, aci kata arwactan!» Tecikotc ki acteroweriw kaie ki micta arwactaniw. <sup>40</sup>Aci itew Cecoc anahweriw owitcewakana: «Kekwan wetci micta sekisiekw? Nama ani awocamec kit asperimototowinawaw?»

<sup>41</sup>Aric micta sekisipanak. Aci aititowok: «Awin a anahwe iriniw ka micta sapitakotc wawatc e rotinik kaie tca e mitcahanik sakihikaniw!»

---

<sup>x</sup> 4.38 Kekotc: Kiskinohamake iriniw





*Irinw ka ki pitcitechekakotc matci awihawica, rikwaskanik e taciketc*

### **Cecoc e kikehatc iriniwa mitcet matci awihawica e ki pitcitechekakoritci**

*(Natawapata kaie Matt 8.28-34; Luc 8.26-39)*

**5** <sup>1</sup>Aci iti macakawok Cecoc kirika owitcewakana nte Géraséniens iriniwok ka ici otaskitcik, nete akam sakihi-kanik Galilée. <sup>2</sup>Mia e iti kapatc Cecoc, tecikotc peikw iriniwa pe natawapamiko, rikwaskanik e ototeritci. Anahwe iriniw ki pitcitechekakopan matci awihawica. <sup>3</sup>Ekota tca ko neta rikwas-kanik e tacikespan. Nama awik kackitakopan kitci takopitatc, misawatc piwapiskwapiriw e totcikaterik. <sup>4</sup>Aci mitcetwaw ki kotci takopitakaniwipan, oskatik kaie otcitcik. Mocak aric ki kackihopan, e pikotatc aniheriw piwapiskwapiriw. Nama awik tipi mackowisikopan kitci ki matcikonatc. <sup>5</sup>Aspinikotc e kickarik kaie e tipiskarik pamotekopan neta rikwaskanik, kaie ko nte matinacik pa aicapan e micta nanotakositc kaie tca e wisakaho-tisotc, asiniwa e otatamohotisowaketc.

<sup>6</sup>Aci warawik otci wapamew Cecoca. Ekoni e ici mowinitatc e nipiskoparictowatc, <sup>7</sup>e itatc e micta kiciwetc: «Kekwan ni ka ici nataweritamowiin, Cecoc, kir Kice Manito ka icperitakositc Okosa? Ki pakoserimitin, Kice Manito otci, aka kitci nekatcihiin!» <sup>8</sup>Wetci itetc aniheriw, osam e ki itikospan Cecoca: «Matci awihawic, orowickowi anahwe iriniw!»

<sup>9</sup>Aci itew Cecoc anihi iriniwa: «Tan ni e icinikasoiin?»

Naskamoriw e iteritci: «Ka mitcetiak nit icinikason. Ni mitcetinan meka.»

<sup>10</sup>Aci kaketin nataweritamowew Cecoca aka kotak wiec kitci iciticohwaritci anahweriw omatci awihawicima.


<sup>11</sup>Nama warawik nta micta mitcetipanak kokocak e nantowapatamowaspan ke mitcikik nte e poskotinacinik. <sup>12</sup>Aci aniki matci awihawicak pakoserimewok Cecoca e itatcik: «Iciticahamacinan neta kokocak ka taticik kitci ki pitcickowakitcik.»

<sup>13</sup>Ki pakitinikowok Cecoca aniheriw ka ki ici nataweritakik. Ekoni ka ici orowitcik matci awihawicak nta irinik, nte kokocik e ici nta pitaketcik. Aci kaskina aniki kokocak, wiec nicwaw kice mitato mitina (2000) e tacitcik, ki ispatawok e ici pinisiwearik e nta pakope kwackotitcik sakihikanik. Kaskina ki kwapawewok.

<sup>14</sup>Tapanak kaie iriniwok ka kanawerimatcik anahweriw kokoca. Ka wapatakik aniheriw ka ispariritci, ki ocimowok e tca nta pa tipatcimotcik otenak kirika kitikan askik. Mitcet iriniwok ki pe nta kanawapatamok ka ki isparinik. <sup>15</sup>Tekocikik neta Cecoca ka ici tacikeritci, wapamewok kaie anihi iriniwa ka ki pitciteheckakorispansa matci awihawiciruw e mitcetiritci, aci tekaci pitoc e icinakosiritci aka e taritci omatci awihawicimiruw. Motcik taci apiruw. Aci owikasimiruw, aci kaie cowatc e itiritci. Ki micta sekisiwok aniki iriniwok. <sup>16</sup>Aniki ka ki wapatakik kaskina ka ki isparinik ki tipatcimowok tan mia ka ki ispariritci iriniwa acitc kokoca. <sup>17</sup>Ki tca pakoserimakaniwiw Cecoc kitci matcatc neta otaskiwak.

<sup>18</sup>Mia e wi iti positc Cecoc tcimanik, kokwetcimiko anihi iriniwa ka ki kikehatc kitci ki witcewikotc. <sup>19</sup>Nama ki otci pakitinew, aric ki itew: «Kiwe neta kimikiwamik, neta ka ici taciketcik kitcirowemakanak. Kaskina tca tipatcimokan ka ki totak Kice Manito kir otci e kitimakerimisk.»

<sup>20</sup>Ekoni e ici matcatc anahwe iriniw e iti tipatcimotc neta askik, Mitato Otenaw ka icinikaterik, kaskina ka ki totamiritci Cecoca wir otci. Kaskina tca ka ki petowatcik ki micta mamiskasitowewok.»



*Iskwew e takinak Cecoca owikasimiriw*

**Jairus otanisa kirika iskwew  
ka ki takinak Cecoca owikasimiriw**

*(Natawapata kaie Matt 9.18-26; Luc 8.40-56)*

<sup>21</sup>Minawatc ki acoham Cecoc nte e kiwetc akam sakihikanik. Mecakatc ote itekekam, micta pe mitcetiriwa iriniwa nte e ici-kapowitc rarewak sakihikanik. <sup>22</sup>Peikw ka nikaniwitc neta cota aiamihe mikiwamik pe takocin. Jairus icinikaso. Ka wapamatc Cecoca ki nipiskoparictowew, <sup>23</sup>e tca pakoserimatc otcitakotc kitci witcihikotc: «Nitanis aci kekat nipo,» itew anahwe ka nikaniwitc. «Petcimote, ki pakoserimitin. Pe nta icitcitericto kitci kiketc, kiapatc tca kitci pimatisitc.»

<sup>24</sup>Ekoni e ici matcatc, Cecoca e witcewikotc. Micta mitcet iriniwok kaie wirawaw pe icawok e witcewatcik. Micta sitcikapowinaniwoniw.

<sup>25</sup>Tapan neta iskwew e akositc. Mocak nakatikopan omikw. Mitato acitc nicwo pipona esko itapinekopan. <sup>26</sup>Mitcet ki natawapamekopan mackiki iriniwa, aric ki micta nekatcihikokopan, nac kaie e ki tcakinak kaskina ocoram. Nama aric peikon awocamec ki otc mirow matisiw. Eckam iti akosipan. <sup>27-28</sup>Aci petakew Cecoca e ici kackitaritci. Aiteritamokopan: «Kecpin takinamowake misawatc tepirak owikasim, ni ta mirwatisin ni.» Otananik tca nte icaw Cecoca e pimoteritci, e micta mitcetina-niwonik, e takinak owikasimiriw. <sup>29</sup>Tecikotc nikapariniw omikw e matcamakanik. Tecikotc kaie kiskeritam aci e kiketc. <sup>30</sup>Mia kotc

kiskeritam Cecoc e ki apatcitakaniwonik memantcic omackowisiwin. Aci kiwepariho e tca itatc iriniwa: «Awin ka ki takinak niwikasimiriw?»

<sup>31</sup>Itiko owitcewakana: «Ki wapaten e sitcikapowinaniwok e micta mitcetinaniwok. Kiapatc a kit itan, 'Awin ka ki takinitc?' »

<sup>32</sup>Aitapiw aric Cecoc kitci kiskerimatc anihi ka ki totamiritci. <sup>33</sup>Anahwe tca iskwew micta ninikipariw e micta kokwarisikeritak, e kiskeritak e ki kikehakaniwite. Pe natawapamew. Nipiskoparictowew e witamowate tapwe ka ki isparinik. <sup>34</sup>Aci itiko Cecoca: «Nitanis, tapwe kit asperimototowin. Ekoni wetci ki kikein. Ekoni ici kiwe. Aka arimerita. Nama aci ki ka ici arimiparin.»

<sup>35</sup>Mekwata e taci arimwetc Cecoc, aci pe takocinok atita iriniwok, anihi Jaïrusa omikiwamirik e ki pe ototetcik,<sup>z</sup> e tca itatcic: «Aci ki ickwa nipo kitanis. Ceckwat kiapatc ki otamihaw okimaw.»

<sup>36</sup>Nama aric aniheriw ki otci pamitam Cecoc. Itew anihi Jaïrus: «Akawir sekisi, tepirak tapwerimici!»

<sup>37</sup>Nama kaie awocamec ki otci pakitinam Cecoc kitci witcewakaniwite. Tepirak Pien kirika Cak kirika Jean (Cak ocima) ki witcewiko. <sup>38</sup>Tekocikik neta anihi ka nikaniritci omikiwamirik, wapatamok e micta mitcetinaniwonik. Petamok e micta matonaniwonik kaie e nanotakosinaniwonik. <sup>39</sup>Ekoni e ici pitaketc neta Cecoc, e tca itatc anahweriw ka matoritci: «Kekwan wetci matoiekw e micta wectatewetaiekw? Nama ni nipo anahwe awacic! Nipaw ni!»


<sup>40</sup>Aci papirotako anahweriw ka ki itatc. Ekoni e ici orowiticohwate. Minawate ki wicamew e nictiritci owitcewakana kirika anihi awaca onikihikoriw kitci pe nta witcewikotc, tapickotc tca e pitaketcik neta aricapik ka ici miciniritci anihi ickweca. <sup>41</sup>Ki otapiniskenew e tca itatc: «Talitha koum!» Wi itemakan anihe: «Ickwecic, kit ititin, onicka!»

<sup>42</sup>Tecikotc ki pasiko anahwe ickwecic, e tca pimotetc. Mitato acite nicwo tato piponesipan. Aniki ka wapatakik aniheriw ki micta kice mamiskateritamok. <sup>43</sup>Aric Cecoc ki itew aka kitci witamakaniwonik. Minawate ki itew: «Mirakw mitcimiriw ke mitcik.»

---

<sup>z</sup> 5.35 Mia itemakan: anihi ka nikaniwiritci cota aiamihe mikiwamik omikiwamirik





*Jairus otanisa kirika anahweriw ka mitatikoritci*

### **Nazareth iriniwok aka e tapwerimatcik Cecoca**

*(Natawapata kaie Matt 13.53-58; Luc 4.16-30)*

**6** <sup>1</sup>Minawatc ki matcaw Cecoc nta ka tacikespan. Nete tca icaw otenak ka ki otci matcekitc. Owitcewakana iti witcewikopan. <sup>2</sup>Aci ka arwepiw kicikarik ki nta kiskinohamakew cota aiamihe mikiwamik. Mitcetinaniwonipan neta. Aniki ka tacikewaspan ki micta mamiskasitowewok. Itepanak: «Tante ka otinak aniheriw ka aitetc? Awiriw ka ki mirikotc aniheriw omiro omitoneritcikan acitc kitci micta mata kackitatc! <sup>3</sup>Namaiew a ni anahwe manike iriniw, Mari<sup>a</sup> okosa? Namaiew a ni kaie octesiwawa Cak kaie Joses, Jude kirika Simo? Namaiew a ni wir kotakihi ocima ka ickweciwiritci ka tacikeritci ota kotenaminak?» Ekoni tca wetci aka ki otci wi tapwerimatcik Cecoca.

<sup>4</sup>Aci itikowok: «Awik ka tipatcimotc Kice Manitowa otci, kaskina wiec kicterimakaniwiw, tepirak nama otenak ka ki otci matcekitc, kaie otcirowemakana nama kicterimiko.»

<sup>5</sup>Nama ki mata kackitaw Cecoc neta otenak, tepirak ki icitcitcerictowew atita ka akosiritci e kikehatc. <sup>6a</sup>Ki mamiskateritam aka e asperimototakotc iriniwa neta otenamik.




*Manike iriniw*

### **Nanicw e iciticohwatc owitcewakana Cecoc kitci tipatcimoritci**

*(Natawapata kaie Matt 10.5-15; Luc 9.1-6)*

<sup>6b</sup>Minawatc nete otenaskak ki pa icaw Cecoc e kiskinohamaketc. <sup>7</sup>Ki wicamew e mitato acitc niciritci owitcewakana. Nanicw e taciritci ki iciticohwew kitci pa aitotiskeritci ke itetc, kirika ki mamirew tiperitamowiniw kitci ki orowiticohwaritci matci awihawiciriw. <sup>8</sup>Kaie minawatc ki itew ohweriw: «Akawir kekocic matcewotakw matcaiekwe, matci tepirak oskahon. Akawir matceworakw pakwecikan, kaie mackomotai akawir matcewotakw. Nama kaie ki ka pitahenawaw coria kitaripociwak. <sup>9</sup>Ki ka piskenawaw kimaskisiniwaw. Akawir aric matcewotakw kotak kipapakiwaniwaw, tepirak anihe ka apatcitaiekw.»

<sup>10</sup>Kiapatc itikowok Cecoca: «Takociniekw otenak, wicamikoiekwe mikiwamik kitci nipaiekw, ekota nta peikonok ke ici tacikeiekw, nac minawatc kitci matcaiekw. <sup>11</sup>Kecpin aric aka ici mireritakawe iriniwok otenamiwak kitci tacikeiekw, kekotc ma wic aka ici pamitakoiekwe, ki ka orowinawaw neta otenamiwak. Ki ka powiparitanawaw kimaskisiniwaw e mirikosiwok, kitci kiskeritakik kecko kekociciriw kitci otitikotcik, aka e mireritci-katerik e aitotisketcik.»



*Ani apitc pitoc icipokwatepan mikiwam. Ki takwaw.*

<sup>12</sup>Aci matcawok, neta e icatcik ka ki ici iciticohwakaniwiticik e nta witamowaticik iriniwa kitci kweskatisiritci. <sup>13</sup>Micta mitcet matci awihawica ki orowiticohwewok kaie mitcet ka akosiritci ki kikehewok, pimiteriw e apatcitaticik.

### **Capatis ka nipahakaniwite**

*(Natawapata kaie Matt 14.1-12; Luc 9.7-9)*

<sup>14</sup>Aci Okimaw Hérode ki petakew kaskina e aitotamiritci Cecoca. Aci meka kaskina wiec petakaniwonikopan. Atita iriniwok itewakopan: «Capatis na ka ki apitcipatc! Ekoni wetci takonik aniheriw tiperitamowiniw Cecoc kitci mata kackitatic!»

<sup>15</sup>Kotakihik itewakopan: «Eli na!»<sup>b</sup>

Kotakihik kiapatc itepanak: «Enko anaha ka nikan tipatcimotc Kice Manito otci, mitowi aniki kotakihik weckatc ka ki pe tatcik!»

<sup>16</sup>Ka petak Hérode aniheriw e iteritci, aci itew: «Capatis na ka ki iteiapan kitci kickikwekohakaniwite, ki aric apitcipaw.» <sup>17-18</sup>Tapwe sani ki itekopan anahwe Hérode kitci makonakaniwiritci Capatisa, kitci takopitakaniwiritci, minawatc tca kitci kipohwakaniwiritci. Wetci ki totamokopanen aniheriw Hérode, osam kitci mireritamihatc otiskwema, Hérodiade ka icinikasoritci. Anahwe iskwew, enkweriw ka ki okomirispan Pirip, Hérode octesa. Peikon ki nipowiwok anahwe Hérode kirika Hérodiade. Mocak meka ki

*Capatis*

itikopan anahwe Hérode Capatisa: «Nama actew kitci otapinimatc kictes okoma.» <sup>19</sup>Mictahi tca cikerimekopan anahwe Hériodiade anihi Capatisa. Wi itekopan kitci nipahakaniwiritci, nama aric ki totamopan, osam anihi Hérode aka e ki otci naheritamiritci.

<sup>20</sup>Anahwe Hérode koctepan Capatisa e kiskeritakipan icikowisk e itatisiritci kaie e kitcitwawisiritci. Nanakatcihepan tca. E natotowaspan e kakeskweritci, wanimikokopan ko anahwe okimaw. Mireritamokopan aric peikon e natotowatc.

<sup>21</sup>Aci peikwaw e kicikarik, mia ka tipickak Hérode, ki otcitci-pariniw anihi otiskwema wiew kitci totamiritci. Mekwata Hérode ki ocitapan kitci makocaniwonik otirinima otci: anahweriw ka witcihikotc ko e tiperitak, acitc anahweriw ka tiperimaritci cimakaniciriw, acitc kotakihi iriniwa ka kicteritakosiritci neta Galilée askik. <sup>22</sup>Mekwata e makocaniwonik, aci pe pitakeriw Hériodiade otanisa neta e ici cipewatikarik. Ki nimiw anahwe ickwecic. Ki micta mireritamihew Héroda kirika kotakihi ka ki wicamakaniwiritci. Aci itiko okimawa anahwe ickwecic: «Kaskina ke ici nataweritamowiin ki ka miritin.»

<sup>23</sup>Kirika itew e nespi tapwetc: «Tapwe ki ka miritin ke ici nataweritaman, misawatc apita ka ici tiperitaman, nataweritamowiine.»

<sup>24</sup>Ekoni e ici orowitc anahwe ickwecic e tca itatc okawiwa: «Kekwan ke ici nataweritamowak?»

Aci itiko: «Capatis octikwan.»

<sup>25</sup>Ekoni minawatc ka ici nta pitakepatatc anahwe ickwecic, e tca nta witamowatc okimawa ka ici nataweritak: «Capatis octikwan ni nataweritamwan tecikotc kitci pe miriin, orakanik tca kitci acterik.»

<sup>26</sup>Micta kackeritam anahwe okimaw. Nama aric ki nakanamowew ani e ici nataweritamakotc, osam e ki nespi tapwetc e petakotc anihi ka ki wicamatc. <sup>27</sup>Tecikotc ki iciticohwew peikw ocimakanicima kitci petaritci Capatisa octikwaniriw. Ki icaw anahwe cimakanic neta kipohotowokamokok e tca kickikwekohatc Capatisa. <sup>28</sup>Minawatc ki iciwotamowew anihi ickweca Capatisa octikwaniriw, orakanik e ki actatc, e miratc. Anahwe tca ickwecic ki mirew anihi okawiwa. <sup>29</sup>Ka petaketcik Capatis owitcewakana ka ki isparinik, ki pe natcipatawok owiawiriw e nta nahikakik mitikowocik.

### **Niaranwaw kice mitato mitina iriniwa (5000) e acamatc Cecoc**

*(Natawapata kaie Matt 14.13-21; Luc 9.10-17; Jean 6.1-14)*

<sup>30</sup>Aci ki pe kiweriwa Cecoc otarotakana,<sup>c</sup> e pe natawapamikotc neta ka ici taciketc. Witamako kaskina ka ki ici aitotamiritci kaie ka ki ici kiskinohamakeritci. <sup>31</sup>Mekwata micta mitcetipanak iriniwok. Atita pe takocinopanak, atita matcapanak. Nama tca ickwa aikewok Cecoc kirika owitcewakana kitci ki mitcisotcik. Ekoni wetci itatc: «Petcimotekw, ki ka nantowapatenano wiewe ke ki ici arwepiekw.» <sup>32</sup>Ekoni tca e ici positcik micta tcimanik, wircikewaw e nta nantowapatakik ke ici arwepitcik.

<sup>33</sup>Aric mitcet iriniwok ki wapamewok e matcehoritci, e nisito-winowatcik. Kaskina wiewe otenaskak otcipatawok, wirtamiwaw e takocikik e motci motetcik neta ka ici icawaspan Cecoc kirika owitcewakana. <sup>34</sup>Ka kapatc Cecoc tcimanik, aci wapamew e micta mitcetinaniwonik. Ki micta kitimakerimew anahweriw iriniwa, osam kekat mia e iterimatc mia maritcenicak aka e tatcik ka nanakatcihikotcik. Ekoni e ici iti kiskinohamowatc mitcet kekociciriw. <sup>35</sup>Aci akwaskowariw ka pe natawapamikotc owitcewakana e tca itikotc: «Aci iti otakocin ota ka ici tacikeikw. Nama takon kekwan ota. <sup>36</sup>Matceticohwik aniki iriniwok kitci icatcik kitikan askik kaie otenacik pecotcik ka takoki, mitcimiriw kitci ki natcipatatcik.»

---

<sup>c</sup> 6.30 Kekotc: onapotema



<sup>37</sup>Aci itikowok Cecoca: «Kirawaw tipirawe nta acamakw.»

Aci kokwetcimewok: «Ki nataweriten a ninan kitci nta otapina-kitc pakwecikan, nicwaw mitato mitina (200) coriawapiskw tca kitci tcakinamak kitci ki mitcisotcik?»<sup>d</sup>

<sup>38</sup>Aci itikowok Cecoca: «Tan e tacitcik kipakwecikanimiwaw? Kotci nta kiskeritamokw.»

Ka ickwa nta kiskeritakik, aci itewok Cecoca: «Niaraniwok pakwecikanak, kaie niciwok namesak.»

<sup>39</sup>Minawatc itew Cecoc owitcewakana papikan kitci apiharitci iriniwa ka tacikerispana neta mackocik. <sup>40</sup>Atita niarano mitina (50) tacipanak, atita kaie mitato mitina (100). <sup>41</sup>Minawatc Cecoc ki otapinew anihi niaran pakwecikana acitc nicw namesa. Ki itapiw icpimik. Mikwetc ki itew Kice Manitoowa. Ki pakwepitew pakwecikana. Ki mamirew owitcewakana kitci mamiraritci anahweriw iriniwa. Peikon kaie ka ki totowatc namesa. Kaskina kiapatc ki papakitinakaniwiriwa. <sup>42</sup>Kaskina nta e tacitcik ki mitcisowok. Ki miro tipipariwok. <sup>43</sup>Aniki Cecoc owitcewakana ki mawotcitawok ka ki ickonikaterik mitcimiriw. Mitato acitc nicw ki mockinetawok pakitenakaniw.<sup>e</sup> <sup>44</sup>Aniki iriniwok ka ki mowatcik pakwecikana, niaranwaw kice mitato mitina (5000) ki taciwakopan.

### **Okitc nipik sakihikanik e pimotoec Cecoc**

*(Natawapata kaie Matt 14.22-33; Jean 6.15-21)*

<sup>45</sup>Minawatc Cecoc ki itew kaskina owitcewakana kitci posiritci tcimanik, wirectamiwaw kitci acohakik sakihikaniw epwamoci wir, nta tca itekera Bethsaïda otenak kitci ici acohakik, wir tca apite Cecoc kitci itate anihi micta mitcet iriniwa ka ki acamakaniwiritci kitci kiweritci. <sup>46</sup>Ka ickwa nakatikotcik kaskina anihi iriniwa, ki matcaw Cecoc, matinacik e nta aiamihatc. <sup>47</sup>Tepiskarik kiapatc tetawakamik sakihikanik nokoniw otcimaniwaw owitcewakana. Wircike tca Cecoc tacikew rarewak. <sup>48</sup>Aci wapamew mictahi e arimikeritci kitci ki mickaritci, osam e nakahacinik e rotinik. Minawatc epwamoci pe wapanik, kiapatc e tipiskarik, iti natawapamew owitcewakana, okitc nipik e pimotoec. Aci kaie kekat iti wimackowew.

<sup>49</sup>Aric ka wapamatcik e pimoteritci okitc nipik, ki iteritamok e amotisotcik. Ki micta nanotakosiwok. <sup>50</sup>Kaskina meka e tacitcik

<sup>d</sup> 6.37 Ani apite tepirak peikowapiskw kanewikopan iriniw tato kickwa ka otamirotc.

<sup>e</sup> 6.43 Kekotc: mackoci orakaniw, otapi orakan

wapamepanak. Ki micta sekisiwok. Tecikotc aric aimihew Cecoc, e itatc, «Sokitehekw! Nin ni! Akawir sekisikw!»

<sup>51</sup>Minawatc ki witci posimew owitcewakana. Ekoni ka acterowerik. Ki micta kice mamiskateritamok. <sup>52</sup>Nama meka apitc moci ki otci nisitotamok ka ki mata kackitaritci Cecoca, anahweriw pakwecikana ka ki micta mitcetihtaritci. Nama meka kackitawok kitci kanaweritakik omitoneritcikaniwak.

### **Cecoc e kikehatc ka akosiritci Génésareth askik itekera**

*(Natawapata kaie Matt 14.34-36)*

<sup>53</sup>Sakihikaniw e ki acohakik Cecoc kirika owitcewakana, aci e macakatcik, seskipitamok otcimaniwaw neta Génésareth askik itekera. <sup>54</sup>Kotc ka ickwa kapatcik tcimanik, mitcet iriniwok ki nisitowinowewok Cecoca. <sup>55</sup>Kaskina wiew otaskiwak aispatawok e nta natcipahatcik otakosikaniwawa, e tetaskonatcik, e tca ici-wotowatcik Cecoca kotc wiew e ici petaketcik nte e ici tacikeritci. <sup>56</sup>Kaskina wiew ka iti icatc Cecoc otenacik, otenaskak, kaie kitikan askik, mitcet iriniwok pe nta arewok ka akosiritci nta ko ka ici mawotcihitonaniwonik, e tca pakoserimatcik Cecoca kitci pakitinamiritci kirike nitek okapotowanik kitci takinamiritci anahweriw otakosikaniwawa. Kaskina tca ka ki takinatcik ki kikewok.

### **Irinivok ka ki ici kiskinohamakotcik okice omocomiwawa**

*(Natawapata kaie Matt 15.1-9)*

**7** <sup>1</sup>Pharisien iriniwok kirika atita ka kiskinohamaketcik cota aiamihe irakonikewiniw ki mawotcihitowok waska Cecoca e ici apiritci. Jérusalem otenak ki ototewakopan. <sup>2</sup>Aci witamok e ki nanakatcitatcik ohweriw, atita Cecoca owitcewakaniw e mitcisoritci aka wirowatc e ki otci kasitciteritci wewerita, kotc e itacterik cota aiamihe irakonikewinik kitci totcikaterik. Iterimewok, ometciciriwa cota aiamihewinik itekera.

<sup>3</sup>Tapwe meka ekoni e itotisketcik aniki Pharisien iriniwok kaie kaskina kotakihik cota iriniwok. Sapitamok ka ki ici kiskinohamakotcik okice omocomiwawa: Nama mitcisowok patoc wewerita e kasitcetcik. <sup>4</sup>Kaie nte e ototetcik ka ki ici atawaniwonik, nama mitcisowok patoc wewerita e kasitcetcik. Mitcet kotakeriw nosanetawakopan weckatc ka ki pe totcikaterik, mitowiriw ohweriw: wewerita kitci totcicatek e kisisipatakaniwoki minikwakana, micta opotaia, askikok ka piwapiskowitcik acitc nipakanatikwa.<sup>f</sup>

<sup>f</sup> 7.4 Ekota nta ka ici mackocikik e mitcisotcik.



*E kasitcitaniwok, kotc e itactek  
cota aiamihe irakonikewinik kitci totcikatek*

<sup>5</sup>Aniki Pharisien iriniwok kirika ka kiskinohamaketcik cota aiamihe irakonikewiniw kokwetcimewok Cecoca: «Kekwariw wetci aka sapitakik kiwitcewakanak aniheriw kiskinohamake-winiw ka ki pe totakik weckatc kikice kimocominapanak? Kekwariw wetci mitcisowaketcik otcitciwaw, e ometciticetcik cota aiamihe irakonikewinik itekera?»

<sup>6</sup>Aci itikowok Cecoca: «Tapwekopan Ésaïe, anahwe weckatc ka ki nikan tipatcimotc Kice Manito wa otci, e arimomitakopanen kirawaw ka miro iriniwikasoiekw, e ki masinahak:

‘Ki itew Kice Manito,  
ni kicterimikok iriniwok e ititakositcik e arimwetcik,  
aric otehiwak nama ni kicterimikok.

<sup>7</sup>Nama wiec irapataniw e nipiskoctowitcik.

Aniheriw meka ka ici kiskinohamaketcik iriniwok  
wirawaw itekasowok, «Kice Manito ni okiskinohamakewin».’ »

*Ésaïe 29.13*

<sup>8</sup>Aci kiapatc itew Cecoc: «Ki pakiteritamwanawaw Kice Manito otirakonikewin, tepirak e wi nosanetaiekw aniheriw iriniwok ka iteritakik kitci ici kicteritcikaterik e pimatisinaniwonik.»

<sup>9</sup>Minawatc kiapatc itew: «Kit iteritenawaw mirwacin ka totamekw e wepinamekw Kice Manito otirakonikewin, kirawaw tca ka ici kicteritamekw kitci ici matisinaniwok kitci apatcitaiekw.

<sup>10</sup>Moïse ki itew:

‘Kicterimi kotawi kaie kikawi.’

*Exode 20.12; Deutéronome 5.16*

Kaie ohweriw:

‘Anahwe ka marerimatc otawiwa kekotc okawiwa,  
acteriw kitci nipahakaniwitc.’

*Exode 21.17*

<sup>11</sup>Aric kirawaw ki kiskinohamakanawaw aka arimatc kitci witci-hatc awik onikihikwa e kitimakisiritci, kecpin e itatc, ‘Nama ki ka ki witcihitinawaw. Aci meka nit ickwa nespi tapwan kitci aiamihe pakitinikeian Kice Manito otci, anihe ke ki miritakokipan.’

<sup>12</sup>Iteritamotake, ‘Nama aci arimatc ni ka witcihawok notawi kaie nikawi.’ Ki pakitinawaw kitci tapweritak aniheriw. <sup>13</sup>Ani e totamekw, ki pikotawanawaw Kice Manito otitewin, ani e ici kiskinohamakeiekw. Nipara kotak kekocic ki totenawaw mitowi anihe kitci ki otci onicinikik iriniwok.»

### **Anihe ke ki ometcickakoikw kitcicakocinak itekera**

*(Natawapata kaie Matt 15.10-20)*

<sup>14</sup>Minawatc Cecoc ki wicamew iriniwa nte e micta mitcetiritci, e tca itatc: «Kaskina natotacikw ohwe ke iteian, kitci miro nisitotamekw: <sup>15</sup>Nama ometcickako otcicakocik iriniw tepirak e ki mitcik kekociciriw.<sup>g</sup> Tepirak otehih ka orowiparinik, enkweriw ka ometcickakotc.<sup>h</sup> [<sup>16</sup>Wewerita natotamokw ohwe, kirawaw ka kackitaiekw kitci nisitotamekw.]]<sup>i</sup>

<sup>17</sup>Ka ickwa nakatatc Cecoc nta iriniwa, ki pitakew mikiwamik. Ki pe natawapamiko owitcewakana e kokwetcimikotc aniheriw ka wi itespan. <sup>18</sup>Aci itew: «Kaie kirawaw a, nama ki kackitanawaw kitci nisitotamekw? Nama a ni ki nisitotenawaw, awik e mitcik kekociciriw, nama ometcickako aniheriw, otcicakocik itekera.<sup>j</sup>

<sup>19</sup>Nama meka otehih pitakepariniw, aric omisitak, minawatc tca pe orowipariniw.» Aniheriw ka itetc Cecoc, witamopan matci kaskina mitcimiriw kitci ki mitcinaniwonik.<sup>k</sup>

<sup>20</sup>Kiapatc ki itew: «Aniheriw ka orowiparinik e maratanik iriniw otehih, enkweriw ka ometcickakotc otcicakocik itekera.<sup>h</sup> <sup>21</sup>Otehih

<sup>g</sup> 7.15 Wi itemakanotake: Nama iterimiko Kice Manitowa «ometciw» aniheriw otci.

<sup>h</sup> 7.15,20 Kekotc: enkweriw ka otci iterimikotc Kice Manitowa «ometciw»

<sup>i</sup> 7.16 Mia itemakan: «Wewerita natotamokw, kecpin takonokwen kitokawaw.»

<sup>j</sup> 7.18 Kekotc: namaieriw aniheriw ka otci iterimikotc Kice Manitoa «ometciw»

<sup>k</sup> 7.19 Itasinateriw meka otaiamihe irakonikewiniwak cota iriniwok aka kitci mitcikik atita mitcimiriw.



meka, ekota e otciparinik e matci iteritak. Ekota tca minawate e otciparinik e matci matisitc, kaie e kimotitc, e manohotc, <sup>22</sup>e pacikwatisitc,<sup>l</sup> kaie e nataweritak kitci tatak e ici tatamiritci owitc iriniwa. Ekota kaie ka otciparinik awik e matcitwatc, e wecimiwetc, e matceritikositc, e asawokeritak, e mareritciketc, e sasekatc, kaie e kiwockweritak. <sup>23</sup>Kaskina anihi matci kekocica, otehih orowipariniw iriniw. Ekota tca wetci ometcickakotc otcitcakocik itekera.»<sup>m</sup>

### **Cecoc e tapwerimikotc iskwewa kotak askik e otciritci**

*(Natawapata kaie Matt 15.21-28)*

<sup>24</sup>Aci neta matcaw Cecoc, nete itekera e icatc pecotcik otenariw ka ici takonik, Tyr ka icinikaterik. Peikw mikiwamik ki pitakew. Ki nataweritam aka kitci kiskeritakonik e taciketc neta, peikon aric ki petakaniwoniw.

<sup>25</sup>Tapan nta peikw iskwew, otanisa e ki pitcickakoritci matci awihawiciriw. Ki petakew e arimomakaniwiritci Cecoca. Ki tca natawapamew e nipiskoparictowate. <sup>26</sup>Kotak askik ki otcikopan anahwe iskwew, Phénicie askik, Syrie askik itekera. Aci ki pakoserimew Cecoca kitci orowiticohwaritci anihi matci awihawiriw, otanisa ka ki pitcickakoritci. <sup>27</sup>Aci itew Cecoc: «Pakitinakw awacak wirtamiwaw kitci mitcisotcik kitci tipipariticik. Nama meka mirwaciniw e maskamakaniwitcik omitcimimiwaw, atimwa tca kitci iciwepinamowakaniwiritci.»<sup>n</sup>

<sup>28</sup>Aci itiko anihi iskwewa: «Tapwe, Okimaw, aric wawate atimok kaie wirawaw mitciwok cipa mitcisowakanik mitcimiriw, awaca ka ki kitickinamiritci.»

<sup>29</sup>Aci itiko Cecoca: «Ekoni ici kiwe. Osam ani e ki ici naskamoin, aci ickwa orowiriw matci awihawica kitanisik.»

<sup>30</sup>Ekoni ka ici kiwetc omikiwamik. Ki tca wapamew onitcanica e miciniritci nipakanatikok. Aci tapwe ki ickwa orowiripan anihi matci awihawica.

### **Irihiw ka kipitetc kaie aka e arimwetc e kikehakaniwite**

<sup>31</sup>Aci matcaw Cecoc nta Tyr otenak. Nte ki icaw Sidon otenak. Minawate nte ki ici pe kiwew Galilée sakihihikanik, e capotoweckak

---

<sup>l</sup> 7.22 Wi itemakan anihe: e wecimetc okoma kekotc ma onapema

<sup>m</sup> 7.23 Kekotc: ka otciterimikotc Kice Manitoowa «ometciw»

<sup>n</sup> 7.27 Arimotamotake ota Cecoc e ki mirakaniwite wirtamiwaw cota iriniwa kitci wicihatc.

aniheriw askiriw, Mitato Otenaw ka icinikaterik. <sup>32</sup>Ki pe iciwoto-wakaniwiw peikw iriniwa ka kipiteritci aka kaie tapwe e nitaweritci. Ki tca itakaniwiw Cecoc kitci icitciterictowatc kitci kikeritci. <sup>33</sup>Aci iciworew Cecoc anihi iriniwa, wircikewaw kitci taciketcik. Ki icitcitectaw otokarik. Minawatc ki takitotowew osikowinapo oterinirik. <sup>34</sup>Minawatc ki icpapiw wakwek e racitamotc kirika e itatc anihi iriniwa: «Effta.» (Aniheriw ka itetc, wi itemakaniw araméen arimwewinik: Cena.)

<sup>35</sup>Tecikotc ki iti miro petam anahwe iriniw kaie wewerita ki iti kackitaw e arimwetc. Aci miro nisitotakosiw. <sup>36</sup>Ki itikowok Cecoca aniki iriniwok nta ka tacikewaspan aka kitci pamatisoketcik. Aric kirawe e otcinehokotcik, kirawe kiapatc pamatisokewok. <sup>37</sup>Micta kice mamiskateritamok. Itewok: «Kaskina ka aitotak, kaskina micta mirwaciniw! Wawatc totam kitci petamiritci ka kipiteritci kaie aka ka kackitaritci ka arimweritci kitci miro nisitotakosiritci!»

### **Newaw kice mitato mitina (4000) iriniwa e acamatc Cecoc**

*(Natawapata kaie Matt 15.32-39)*

**8** <sup>1</sup>Ani apitc kiapatc micta mitcet iriniwok ki mawotcihitowok neta ka ici kiskinohamakespan Cecoc. Nac nama otc takoniw ke mitcikik aniki iriniwok. Aci Cecoc wicamew owitcewakana e itatc: <sup>2</sup>«Ni kitimakerimawok aniki iriniwok. Aci meka nicto kickwa esko pe tacikemitcik ota. Nama tca aci takoniw ke mitcikik. <sup>3</sup>Kecpin kiweticohwake aka e mitcisotcik, kata iti pakicinok meskanak e kiwetcik. Warawik meka ki pe ototewok.»

<sup>4</sup>Itiko anahweriw owitcewakana: «Tante tca ke ki otinamak mitcim kitci acamakitcik ni e tacitcik iriniwok, aka tca e takok ota kekocic?»

<sup>5</sup>Kokwetcimew Cecoc e itatc: «Tan e tacitcik kipakwecikanimi-wawok?»<sup>o</sup>

«Nicowaso (7) taciwok,» itewok.

<sup>6</sup>Aci Cecoc itew anihi iriniwa e micta mitcetiritci kitci aipiritci motcik. Minawatc ki otapinew anahweriw e nicowatciritci pakwecikana. Mikwetc ki itew Kice Manitowa. Ki pakwepitew. Ki mirew owitcewakana kitci mampiraritci kaskina anihi iriniwa. Ki tca papakitineriwa. <sup>7</sup>Atita namesa kirika taripana. Mikwetc ki itew kiapatc Kice Manitowa, kirika ki itew owitcewakana kitci

papakitinaritci. <sup>8</sup>Tato nta e tacitcik ki mitcisowok aniki iriniwok, kaie ki miro tipipariwok. Ka ickwa mitcisonaniwonik, Cecoc owitcewakana ki mawotcitawok kiapatc nicowaso pakitenakaniw<sup>p</sup> e mockinerik mitcimiriw e ickoparinik. <sup>9</sup>Aniki iriniwok ka ki mitcisotcik, wiec newaw kice mitato mitina (4000) taciwakopan. Minawatc Cecoc ki itew anahweriw iriniwa kitci kiweritci. <sup>10</sup>Ki posiw tcimanik kirika owitcewakana, nete e icatcik Dalmanoutha askik itekera.<sup>q</sup>

### **Pharisien iriniwok e nataweritamowatcik Cecoca kitci mata kackitaritci**

*(Natawapata kaie Matt 16.1-4)*

<sup>11</sup>Minawatc Pharisien iriniwok ki pe takocinok. Ekoni e iti aimihitotcik kirika Cecoca. Wi paciwarewakopan Cecoca arotc kitci iteritci, kitci ki tca takonik ke ki otci itactahorakaniwiritci.<sup>r</sup> Ekoni tca e ici nataweritamowatcik kitci mata kackitaritci, kitci tca wapatahikotcik e apitc ma tapwe Kice Manitowa ki miriko-kwen aniheriw e ici kackitatc. <sup>12</sup>Ki micta iskotamo Cecoc e itetc: «Kekwariw wetci micta nataweritakik anotc iriniwok kitci mata kackitaniwonik? Tapwe ohwe ka ititakok, nama kata mirakaniwiwok kitci wapatakik aniheriw.»

<sup>13</sup>Minawatc ki nakatew anahweriw iriniwa. Ki posiw tcimanik e acohak, akam sakihikanik e icatc.

### **Ociwockitciticikaniwaw Pharisien iriniwok kirika Hérode**

*(Natawapata kaie Matt 16.5-12)*

<sup>14</sup>Ki onikepanak aniki Cecoc owitcewakana kitci matcewotatcik mitcimiriw otcimaniwak. Tepirak peikociriw pakwecikana. <sup>15</sup>Aci itikowok Cecoca: «Aiekwamisikw! Nanakatcihitisokw aka kitci apatcihimekw ociwockitciticikaniwaw Pharisien iriniwok, kaie okimaw Hérode anihi!»

<sup>16</sup>Aititowok Cecoc owitcewakana: «Pot wetci aitetc aniheriw, osam aka e opakwecikanimiikw.»

<sup>17</sup>Kiskerimew Cecoc ani e aiteritamiritci. Aci kokwetcimew: «Kekwan wetci iteiekw ‘osam aka e opakwecikanimiikw’? Nama ani moci ki nisitotenawaw? Nama a ni ki kackitanawaw kitci

---

<sup>p</sup> 8.8 Kekotc: mackoci orakaniw, otapi orakaniw

<sup>q</sup> 8.10 Nama kiskeritakon tante mia e ici takok anihe aski.

<sup>r</sup> 8.11 Kata takoniw meka kitci itactahorakaniwitc, kecpin pitoc itete kirika cota aiamihe irakonikewiniw.

mamitoneritamekw? <sup>18</sup>Takon kickicikowaw. Nama a tca ki wapatenawaw? Takon kaie kitokawaw. Peikon a nama ki petenawaw? Aci kote kit ickwa onikanawaw, <sup>19</sup>ka pakwepitakik niaran pakwecikanak, aniki otci iriniwok niaranaw kice mitato mitina (5000) ka ki tacitcik, tan tato ka ki mawotcitaiekw pakitenakan<sup>s</sup> e mockinek nta mitcim e ki ickoparik?»

«Mitato acite nicw,» itiko owitcewakana.

<sup>20</sup>«Minawate aniki nicowaso (7) pakwecikana ka pakwepitakik, aniki otci iriniwok newaw kice mitato mitina (4000) ka ki tacitcik, tan tato ka ki mawotcitaiekw pakitenakan e mockinek nta mitcim e ki ickoparik?»

«Nicowaso,» itiko owitcewakana.

<sup>21</sup>Aci minawate itikowok Cecoca: «Nama a tca kiapatc ki nisitotenawaw anihe ka aiarimotamapan?»

### **Bethsaïda otenacik e kikehakaniwite iriniw aka ka wapite**

<sup>22</sup>Aci takocinok Bethsaïda otenacik. Iciwotowakaniwiw neta Cecoc iriniwa aka ka wapiritci, e tca pakoserimikote tepirak kitci takinate kitci kikehatc. <sup>23</sup>Aci otapineskenew Cecoc anihi aka ka wapiritci. Nte tca iciworew nakewar otenacik. Minawate ki actamowew osikowinapo<sup>t</sup> ockicikorik anihi iriniwa. Ki icitcitcerictowew e tca kokwetcimatc: «Ki wapaten a kekocic?»

<sup>24</sup>Itapiw anahwe aka ka wapite e tca itetc: «Ni wapamawok iriniwok kekat mitowi mictikok e aicinakositcik, aric pamotewok ni.»

<sup>25</sup>Kiapatc icitcitcerictowew Cecoc anihi iriniwa ockicikorik. Tipickote nikanik itapiwiw. Ekoni e kikeritci. Aci kaskina micta miro wapatamiriw. <sup>26</sup>Kiweticohwew tca Cecoc omikiwamirik e tca itate: «Akawir ica neta otenacik.»

### **Pien e witak tan e iterimatc Cecoca**

*(Natawapata kaie Matt 16.13-20; Luc 9.18-21)*

<sup>27</sup>Minawate ki matcawok Cecoc kirika owitcewakana, neta e icatcik otenaciskarik, pecotcik ka ici takonik aniheriw otenariw Césarée de Philippe ka icinikaterik. Mekwata e pimotetcik, aci kokwetcimew Cecoc: «Tan e itetcik iriniwok e arimomitcik?»

---

<sup>s</sup> 8.19 Kekote: mackoci orakan, otapi orakan

<sup>t</sup> 8.23 Kekote: otiskowinapo



<sup>28</sup>Itiko owitcewakana: «Atita itewok, ‘Capatis anahwa.’ Kotakihik, ‘Eli.’ Kotakihik kiapatc itewok, ‘Peikw weckatc ka nikan tipatcimospan.’»

<sup>29</sup>«Aric kirawaw,» itikowok Cecoca: «Tan e iteiekw e arimomiekw?»

Pien itew: «Kir, Kice Manito ka ki itespan kitci pe iciticohwatc!»

<sup>30</sup>Aci itew Cecoc anahweriw owitcewakana aka awiriw kitci arimotamowaritci.

### **E witak Cecoc ke iciwepasitc**

*(Natawapata kaie Matt 16.21-28; Luc 9.22-27)*

<sup>31</sup>Minawatc Cecoc iti kiskinohamowew owitcewakana, e itatc: «Actew Iriniw Okosa<sup>u</sup> kitci micta nekatcitatc. Cota aiamihe okimawok<sup>v</sup> acitc aniki ka tiperimatcik cota mekotewokorewa kaie ka kiskinohamaketcik cota aiamihe irakonikewiniw, kaskina kata wepakonewok. Kata nipahakaniwiw. Minawatc ickwa nicto kickokarike kata apitcipaw.»

<sup>32</sup>Wewerita ki witamowew aniheriw kitci miro nisitotamiritci. Aci tipan ki iciworiko Piena, wircikewaw kitci arimwetcik. Kaketin ki aimihiko Cecoc aniheriw e ki itetc. <sup>33</sup>Aric kiwekapowiw Cecoc e kanawapamatc anihi kotakihi owitcewakana, e itatc anihi Piena, kaketin e aimihatc: «Matca, matca, Satan,» itew Cecoc, «Nama mia Kice Manito kit iteriten, aric tepirak mia iriniwok!»

<sup>34</sup>Minawatc Cecoc ki wicamew anihi iriniwa e mitcetiritci kirika owitcewakana kitci pe natotakotc, e itatc: «Kecpin awik wi nosanehwite, kata ponitaw e mamitonerimitisotc. Acteriw kitci miworatc otcipaiatikoma kaie kitci nosanehwitc. <sup>35</sup>Anahwe meka tepirak ka wi kanaweritak ota askik opimatisiwin, kata onitaw. Aric anahwe ke pakitinak opimatisiwin nin e nosanehwitc, kirika miro tipatcimowiniw otci, nespitc kata kanaweritam. <sup>36</sup>Ceckwat awik kata tatamopan kaskina kekociciriw ota askik, kecpin wir tipirawe onicimitisote. <sup>37</sup>Kecpin awik onitate opimatisiwin,<sup>w</sup> takoniw a kekociciriw ke ki meckotc miriwetc, kitci ki pe kiwe mirakaniwitc aniheriw opimatisiwin?<sup>w</sup> Nama! <sup>38</sup>Anotc nama orina wi nosanehwakaniwiw Kice Manito. Matci itatisiwin wi nosanetakaniwon. Kecpin awik akatcihite nin kirika nititewiniw, kata

<sup>u</sup> 8.31 Arimomitiso ota Cecoc.

<sup>v</sup> 8.31 Ka nikaniwitcik cota aiamihewinik itekera

<sup>w</sup> 8.37 Kekotc: otcitcakoca

akatcihiko kaie wir Iriniw Okosa<sup>x</sup> minawatc pe takociniritena Otawiriw okicteritakosiwinirik, Kice Manito otacerima kitci pe witcewikoritci.»

**9** <sup>1</sup>«Tapwe ohwe ka witamatakok, atita nta e taciekw nama tecikotc kata nipowok, patoc ickwa wapatakawe Kice Manito Okimawiniw e takociparinik e micta mackowisimakanik.»

### Keskat pitoc e iti icinakositc Cecoc

(Natawapata kaie Matt 17.1-13; Luc 9.28-36)

<sup>2</sup>Minawatc nikotwaso kickwa e ickwa itetc aniheriw, aci matcaw Cecoc. Nicto owitcewakana ki wicamew, Pien, Cak kirika Jean. Nete ki icawok matinak e micta icpatinarik. Wircikewaw nete ki tacikewok. Kek pitoc iti icinakosiw Cecoc. <sup>3</sup>Iti micta wapariw owikasima, mia kon. E apitc wasiterik, nama awik ota askik kata kackitapan ani kitci ki asitci wapekahak wikasiriw. <sup>4</sup>Kek wapamewok nicw iriniwa, Eli kirika Moïse ka icinikasoritci,<sup>y</sup> e taci aimihitotcik kirika Cecoca. <sup>5</sup>Aci itew anahwe Pien Cecoca: «Okimaw, mirwacin e taciikeikw ota kirano. Ni ka orekahenan



*Micta pitoc e iti icinakositc Cecoc*

<sup>x</sup> 8.38 Arimomitiso ota Cecoc.

<sup>y</sup> 9.4 Weckatc ki pimatisiwakopan e nikan tipatcimowakopanen Kice Manito otc.

nicto rakasimonikiwam, peikw kir otci, kotak tca Moïse otci, minawatc anihe kotak Eli otci!»

<sup>6</sup>Ekoni ka itetc Pien, aric nama tapwe kiskeritamopan aniheriw ka itetc. Sekisipanak meka kaskina e tacitcik. <sup>7</sup>Aci pe nokon osko. Tekaci ki karikowok. Kek petakon e otci arimwaniwok, e itwaniwok: «Enko ohwa nikosis e micta sakihak. Natotowakw!»

<sup>8</sup>Aci itapiwok aniki Cecoc owitcewakana. Wapatamok aka aci e nokosiritci anahweriw Eli kirika Moïse, aci tca neta e peikokapowiritci Cecoca.

<sup>9</sup>E iti nitcitciwetcik Cecoc kirika owitcewakana, aci itew: «Aka awik atisokakw anihe ka ki ici wapatamekw, patoc ickwa apitcipate Iriniw Okosa.»<sup>z</sup>

<sup>10</sup>Nama tca ki otci pamatisokewok, aric kokwetcimitowakopan: «Tan wa itemakanik aniheriw ka itetc, kitci apitcipaniwonik?»

<sup>11</sup>Minawatc kokwetcimewok Cecoca: «Kekwariw wetci itetcik aniki ka kiskinohamaketcik cota aiamihe irakonikewiniw wirctam anihi Eli kitci pe icaritci?»

<sup>12a</sup>Itikowok Cecoca: «Tapwe wirata wirctam kata pe icaw Eli kitci pe nta wecitac kaskina ka matciparinik, mia ocki kitci iteritakonik. <sup>13</sup>Aci aric ki ickwa pe takocin anaha Eli. Mitcet iriniwok ki aitotowewok ka ki aiteritakik, kotc e itacterik Kice Manito Omasinahikanik. <sup>12b</sup>Ekoni peikon ke ici nekatcitac Iriniw Okosa<sup>z</sup> kirika kata wepakonakaniwiw, kotc ka masinaterik Kice Manito Omasinahikanik.»

**Ockinikicica e kikehatc Cecoc,  
matci awihawiciriw e ki pitcitechekakoritci**

*(Natawapata kaie Matt 17.14-21; Luc 9.37-43a)*

<sup>14</sup>Tekocikik nete ka ici tacikeritci anihi kotakihi owitcewakana Cecoc, wapatamok e micta mitcetinaniwonik waska e ici tacikeritci. Tawok kaie atita iriniwok ka kiskinohamaketcik cota aiamihe irakonikewiniw, e taci kikamitotcik kirika Cecoc owitcewakana. <sup>15</sup>Kotc e wapamatcik Cecoca, micta kockopariwok. Mowinitewok e wi arimikowatcik. <sup>16</sup>Aci Cecoc kokwetcimew owitcewakana: «Kekwan ka arimotamekw kirika aniki kiskinohamake iriniwok e kikamitoiekw?»

---

<sup>z</sup> 9.9,12b Arimomitiso ota Cecoc.

<sup>17</sup>Peikw neta otci arimwew iriniw taci e micta mitcetiniwonik: «Okimaw, ni ki pe iciworaw nikosis kir otci, osam e ki pitciteheckakotc matci awihawica. Nama tca ki arimwew. <sup>18</sup>Tatwaw e macikakotc anihi matci awihawica, wepicimiko motcik e micta pictewotamotc. Kakiceapitecin acitc e micta tcitowaskositc, kaskina e itikititc. Ni ki tca nataweritamowawok kiwitcewakanak kitci orowiticohwatcik anihi matci awihawica, nama aric kackihewok.»

<sup>19</sup>Aci itikowok Cecoca: «Wesa kirawaw, aka ka asperimototowiekw! Tan irikik ke actek kitci witci tacikemitakok? Tan kaie irikik ke actek kitci witcihitakok? Pecowakw anahwe ockinikicic.»

<sup>20</sup>Ekoni e ici iciwotowakaniwitc Cecoc anihi ockinikicica. Anahwe matci awihawic, kotc e wapamate Cecoca, ki micta aiatciparihew anihi ockinikicica. Ekoni e ici pakiciniritci motcik e kwekwetiparihoritci. Micta pictewotamoriw. <sup>21</sup>Aci kokwetcimew Cecoc anihi otatamiriw ockinikicica: «Tan apitc esko aniheriw icinakositc?»

Itew anahwe iriniw: «Kotc e iti awaciwitc. <sup>22</sup>Mitcetwaw ki kotci nipahiko anihi matci awihawica, e matcicte wepinikotc kekotc e pakope wepinikotc. Kitimakerimicinan kirika witcihicinan, keckitawonen.»

<sup>23</sup>Itew Cecoc. «Kit icin, 'keckitawonen'. Kaskina meka kekociciriw kackitaw anahwe ka tapwerimatc Kice Maniowa.»<sup>a</sup>

<sup>24</sup>Kek tepwew anahwe iriniw e tca itetc: «Ni tapweriten ni wirata. Witcihici aric, nit arimisin meka kitci tipi tapweritaman!»

<sup>25</sup>Cecoc wapamew iriniwa e micta mitcetiritci e pe nta mipataritci. Ekoni e ici iti tepwatatc anihi matci awihawica e itatc: «Kir matci awihawic ka totaman kitci kipitaniwok kirika aka kitci arimwaniwok. Kit ititin kitci orowiin neta ockinikicicik. Akawir minawatc wiskat pitake neta!»

<sup>26</sup>Ekoni ka ici micta nanotakositc anahwe matci awihawic. Kaketin aiatciparihew anihi ockinikicica, e tca orowitc. Anahwe ockinikicic, mia e nipotc icinakosiw. Kaskina awik itew: «Nipo ni anahwe!» <sup>27</sup>Aric ki otapiniskenew Cecoc anihi ockinikicica e tca witcihatc e pasikoritci.

---

<sup>a</sup> 9.23 Kekotc: ka tapweritak



<sup>28</sup>Ka ickwa pitaketcik mikiwamik Cecoc kirika owitcewakana, wircikewaw ka taciketcik, ki kokwetcimiko anahweriw owitcewakana: «Kekwan aka wetci ki orowiticohwakitc anahwe matci awihawic ka ki pitciteheckowatc anihi ockinikicica?»

<sup>29</sup>Itikowok Cecoca: «Tepirak pakoserimowin apatan kitci ki orowiticohwakaniwitc anahwe towi matci awihawic.»

### **Kiapatc e witak Cecoc ke iciwepasitc**

*(Natawapata kaie Matt 17.22-23; Luc 9.43b-45)*

<sup>30</sup>Minawatc Cecoc kirika owitcewakana ki matcawok neta. Ki capitoweckamok Galilée askiriw. Nama mireritamopan Cecoc kitci kiskerimakaniwitcik tante e ici taciketcik, <sup>31</sup>osam meka anahweriw owitcewakana wi kiskinohamowepan. Ki itew: «Iriiniw Okosa<sup>b</sup> kata pakiterimakaniwiw kitci makonikotc iriniwa. Kata nipahiko. Minawatc ickwa nicto kickokarike kata apitcipaw.»

<sup>32</sup>Nama aric ki otci nisitotamok aniheriw wa iteritci Cecoca, kaie ki kokwarisikeritamok kitci kokwetcimatcik.

### **Awin ka mawotci kicteritakositc?**

*(Natawapata kaie Matt 18.1-5; Luc 9.46-48)*

<sup>33</sup>Aci Capernaüm otenak ki takocinok. Ki pitakewok mikiwamik. Aci Cecoc kokwetcimew anahweriw owitcewakana: «Kekwan ni ka ki arimotamekw e kikamitoiekw mekwata ka pe moteikw?»

<sup>34</sup>Nama aric kitowok, osam e ki kikatotcik, aniheriw e arimotakik awin neta e tacitcik ka mawotci kicteritakositc. <sup>35</sup>Ki apiw Cecoc. Wicamew anihi owitcewakana e mitato acitc niciritci kitci pe natotakotc e itatc: «Kecpin awik iteritake kitci nikanickatc, mia awik e otananickatc kata totam. Kata tca atoskectowew kaskina owitc iriniwa.»

<sup>36</sup>Aci peikw awaca natcipahew e nanipowihatc nikanik e ici tacikeritci owitcewakana. Takonew anihi awaca e itatc iriniwa: <sup>37</sup>«Anahwe ka kicterimatc awaca mitowiriw ohweriw awaca ka witcikapowictowiritci, e kicterimatc anihi nin otci,<sup>c</sup> nin tipirawe ni kicterimikw. Kaie anahwe ka kicterimitc, nama ni nin tepirak ni kicterimikw. Kicterimew kaie anihi ka ki pe iciticohwitc.»

<sup>b</sup> 9.31 Arimomitiso ota Cecoc.

<sup>c</sup> 9.37 Kekotc: osam e sakihitc

## Awik aka e wi cakotcihitokw, ki witcewikono ni

(Natawapata kaie Luc 9.49-50)

<sup>38</sup>Jean itew Cecoca: «Okimaw, ni ki wapamanan iriniw e orowiticohwatc matci awihawica irinik, kiticinikasowiniw e apatcitatc.<sup>d</sup> Ni ki itanan aka nte kitci totak, osam aka e witcewisk, mitowi ninan e witcewitak.»

<sup>39</sup>Aci itiko Cecoca: «Akawir otcinehwakw. Nama meka awik kackitaw kitci mata kackitac niticinikasowiniw e apatcitac, minawatc tca kitci marerimitc. <sup>40</sup>Kecpin meka awik aka e wi cakotcihitokw, ki witcewikono ni. <sup>41</sup>Tapwe kaie ohwe ka ititakok: Kaskina awik ke minihitakw nipiriw, osam e okimamiekw Krist, kata pe otitiko aniheriw ka ki kackitamatisotc.»

## E apitc maratak e pactatinaniwok

(Natawapata kaie Matt 18.6-9; Luc 17.1-2)

<sup>42</sup>«Kecpin awik e cikimatc peikw nta e taciritci ka apiciciritci ka nosanehwiritci kitci pactatiritci, kirawe kata miroparinipan wir otci, anahwe ka ki cikimiwetc, micta asiniwa kitci takopitakaniwiritci okowak, kitci tca pakopepinakaniwitc kitcikamik.»

<sup>43</sup>«Kecpin kitcitci e pactatiwakein, kickitcitcehotiso. Kirawe kata miroparinopan kir otci kitci pitakein tapwe matisiwinik tepirak kitci peikocik kitcitci, patok kitci kanaweritaman e niciki, atamaskamokok kitci icain, nete ickote aka wiskat e actowek. [<sup>44</sup>Nte, 'mantcacak ka mitcikik ko wiawiriw nama wiskat nipowok, kaie anihe ickote nama wiskat actowew.']»<sup>e</sup>

<sup>45</sup>«Kecpin kisit e pactatiwakein, kickisitehotiso. Kirawe kata miroparinopan kir otci kitci pitakein tapwe matisiwinik tepirak e peikocik kisit, patok e niciki kitci kanaweritaman, atamaskamokok tca kitci iciwepinikoin.» [<sup>46</sup>Nte, 'mantcacak ka mitcikik ko wiawiriw nama wiskat nipowok, kaie anihe ickote nama wiskat actowew.']»<sup>e</sup>

<sup>47</sup>«Kecpin kirika kickicikw e pactatiwakein, manipata. Kirawe kata miroparinopan kir otci kitci pitakein Kice Manito Okimawinik tepirak e peikocik kickicikw, patok e niciki kitci kanaweritaman, kitci tca iciwepinikoin atamaskamokok. <sup>48</sup>Itemakan meka:

---

<sup>d</sup> 9.38 Kekotc: kir otci

<sup>e</sup> 9.44,46 Nama takon ohwe mitcet weckatc masinahikanik.

Nte, 'mantcacak ka mitcikik ko wiariw nama wiskat nipowok, kaie anihe ickote nama wiskat actowew.' »

*Ésaïe 66.24*

<sup>49</sup>«Tapwe wirata, tato nta e taciikw kata mirakaniwiw nekatcitawiniw<sup>f</sup> kitci ki otci sokikapowitc, mitowi ciwotakan e apatcitakaniwok kitci ki mirosppokok mitcim.»

<sup>50</sup>«Mirwapatan ciwotakan. Kecpin aric aka awocamec e nispokok, tan ke ki totcikatek kiapatc kitci ki ciwak? Tarasak peikon mia ciwotakan ka mirwapatak ki ta miro irapatisinawaw, kaie pekatc ki ta pimatisinawaw kitci miroparihitoekw kirika kiwitc iriniwawok.»

### E wepinitonaniwok

*(Natawapata kaie Matt 19.1-12; Luc 16.18)*

**10** <sup>1</sup>Minawatc ki matcaw Cecoc, Judée askik itekera e icatc. Minawatc akam sipik Jourdain ka icinikaterik ki iti icaw. Ki micta pe mitcetiriwa kiapatc iriniwa e pe natawapamikotc neta ka ici taciketc. Ki kiskinohamowew, mitowi mocak ka ki pe totak.

<sup>2</sup>Aci pe natawapamiko atita Pharisien iriniwa. Wikokwe paciworikokopan arotc kitci itetc, kitci ki tca takonik ke ki otci itactahorakaniwitc.<sup>g</sup> Kokwetcimiko tca, e itikotc: «Kirano kitirakonikewino, masinatew a matci kitci wepinatc iriniw okoma?»

<sup>3</sup>Cecoc naskamo ka ki kokwetcimakaniwitc, meckotc kaie wir e kokwetcimatc: «Kekw irakonikewin ka ki miritakw Moïse?»

<sup>4</sup>Itewok: «Enko ohweriw Moïse otirakonikewin: Matci kata ki wepinew iriniw okoma. Tepirak masinahikaniw kata ocitaw e witak e matceticohwatc anihi iskwewa, aka aci e wi wikimatc.»

<sup>5</sup>Aci itikowok Cecoca: «Moïse ki ocitaw ohweriw irakonikewiniw kirawaw otci, osam e micta mackowak kitehiwaw. <sup>6</sup>Weckatc ickotok Kice Manito kaskina kekociciriw ka kiceritak, 'Iriwiwa kirika iskwewa ki kicerimew.' »

*Genèse 1.27; 5.2*

Ekoni e itacterik omasinahikanik. <sup>7</sup>Kaie itemakaniw: 'Ekoni wetci itwaniwok,

<sup>f</sup> 9.49 Mia itemakan: ickoteriw

<sup>g</sup> 10.2 Kata takoniw meka kitci itactahorakaniwitc, kecpin pitoc itete kirika cota aiamihe irakonikewiniw.

iriniw kata nakatew otawiwa kaie okawiwa,  
okoma kitci witci tacikematc.

<sup>8</sup>Mia peikw kata iteritakosiwok,' itemakan.

*Genèse 2.24*

Nama aci niciwok kata iteritakosiwok, aric mia peikw awik.

<sup>9</sup>Nama acteriw iriniw kitci pikotatc Kice Manito wa ka ki mamowinamiritci.»

<sup>10</sup>Minawatc ka ickwa pitaketcik mikiwamik, aci kokwetcimiko Cecoc owitcewakana aniheriw ka ki arimotak. <sup>11</sup>Itew: «Kecpin iriniw e matceticohwatc okoma, e tca nipowitc kotakihi iskwewa, akohew anihi okoma. Pacikwatisiw. <sup>12</sup>Peikon kaie wir iskwew, kecpin e wepinatc onapema, e tca nipowitc kotakihi iriniwa, kaie wir pacikwatisiw.»

### **Cecoc e aiamitowatatc awaca**

*(Natawapata kaie Matt 19.13-15; Luc 18.15-17)*

<sup>13</sup>Irinwok iciworepanak awaca kitci aiamitowatikoritci, aric owitcewakaniw ki otcinehokowok. <sup>14</sup>Ka wapatak Cecoc ani e totamiritci owitcewakana, ki kiciwasiw. Ki itew: «Pakitinakok awacak kitci pe natawapamitcik. Akawir otcinehwakok. Enko aniki, mitowihik awacak e iteritakositcik, ka ici tatakik Kice Manito Okimawiniw. <sup>15</sup>Tapwe ohwe ka witamatakok: Kecpin awik aka e ici naheritak kitci pe otitikotc Kice Manito wa Okimawiniw, mitowi awacic e pe otitikotc, nama wiskat kata ki pitakew neta.»

<sup>16</sup>Minawatc ki otapinew anihi awaca, tato neta e taciritci. Ki icitcitcerictowew e tca aiamitowatatc.

### **Irinw ka micikitatc**

*(Natawapata kaie Matt 19.16-30; Luc 18.18-30)*

<sup>17</sup>Mia e iti matcatc Cecoc, aci pe mowinitiko peikw iriniwa e tca nipiskoparictakotc e kokwetcimikotc: «Miro okimaw, tan ke ki totaman kitci ki pe otitikoian kakike matisiwin?»

<sup>18</sup>Aci itiko Cecoca: «Kekwan wetci pe icinikaciin 'miro okimaw'? Nama taw awik e mirwasitc, tepirak Kice Manito. <sup>19</sup>Ki kiskeriten e itemakak cota aiamihe irakonikewin:

‘Akawir manoho.

Akawir kaie pacikwatisi.

Akawir kaie kimoti.

Akawir kiraski, awik kitci ki atamerimakaniwitc.



Akawir kaie wecimi kiwitec iriniw.  
Kicterimik kotawi kaie kikawi.' »

*Exode 20.12-16; Deutéronome 5.16-20*

<sup>20</sup>Aci itew anahwe iriniw: «Okimaw, esko ki awaciwian ni nosanetan anihi irakonikewina.»

<sup>21</sup>Cecoca kanawapamew e sakihatc, e tca itatc: «Peikw kekocic ki noteparin. Matca nta atawe kaskina e ici tataman. Ka kitimaki-sitcik mirakan kicoriamiriw. Ki ka micta micikitan wakwek anihe totamane. Minawatc tca pe nta nosanehocikan.»

<sup>22</sup>Aric ka petak ka ki itikotc Cecoca, ki pakitcikwepariw. Ekoni e ici matcatc e micta kackeritak, osam e micta micikitatc.

<sup>23</sup>Aci kanawapamew Cecoc anahweriw owitcewakana e waskakapowictakotc e tca witamowatc: «Micta arimaniw ka micikitatcik kitci ki pitaketcik Kice Manito Okimawinik.»

<sup>24</sup>Mamiskasitako owitcewakana ani e itetc. Aric kiapatc itew: «Ninitcanicak, mictahi ariman kitci ki pitakaniwok Kice Manito Okimawinik. <sup>25</sup>E apitc arimak, kirawe kata wetasipan atikw<sup>h</sup> kitci ki pitaketc e ici pokoneckarik caponikanik patok ka micikitatc iriniw kitci ki pitaketc Kice Manito Okimawinik.»



Atikw, «un chameau» e icinikatakaniwitec

<sup>26</sup>Ickam kirawe mamiskasitamok<sup>i</sup> aniheriw aniki Cecoc owitcewakana. Aci kokwetcimitowok: «Awin tca ke ki akwacimakaniwite?»

<sup>27</sup>Kanawapamikowok Cecoca e tca itikotcik: «Iriw wok nama kackitawok kitci akwacimitisotcik. Wir aric Kice Manito kackitaw kitci akwacimiwetc. Kaskina meka kekociciriw wir kackitaw.»

<sup>28</sup>Aci itew Pien: «Natotaci! Kaskina kekocic ni ki pakitinenan, ekoni ka ici nosanehotak.»

<sup>29</sup>Aci itiko Cecoca: «Tapwe ohwe ka iteian, kecpin awik nakatake omikiwam acitc otaski, kaie nakatate octesa, omisa, ocima, okawiwa, otawiwa acitc onitcanica, nin otci acitc Miro Tipatci-mowiniw otci, <sup>30</sup>awocamec mitato mitina (100) tatwaw kata mirakaniwuw, anotc mekwata e pimatisitc: mikiwamiruw kaie askiruw, acitc ke octesitc, ke omisitc, ke ocimitc, ke okawitc, ke onitcanicitc acitc ke otaskiwitc kata mirakaniwuw, kirika nekatci-tawiniw kata pe otitiko. Minawatc nanake nikanik kakike matisiwiniw kata pe otitiko.»

<sup>31</sup>«Aric mitcet iriniw wok anotc ka nikanickatcik, kecko otananik kata pimotewok. Aniki tca anotc ka otananickatcik kata nikanickawok.»

### **Aci nictowaw e witak Cecoc ke iciwepasitc**

*(Natawapata kaie Matt 20.17-19; Luc 18.31-34)*

<sup>32</sup>Aci pimotepanak nete meskanak Jérusalemik ka iticimonik. Nikanotepan Cecoc. Owitcewakana kaie tca ka nosanehototcik micta sekisirikopan. Kek tipan ki iciworew Cecoc anihi e mitato acitc niciritci owitcewakana e witamowatc aci kekat ke iti iciwepasitc. <sup>33</sup>Ki itew: «Natotamokw! Aci Jérusalemik kit icanano. Ekota neta ke ici makonakaniwite Iriw Okosa.<sup>j</sup> Kata pakiterimakaniwuw<sup>k</sup> kitci makonikotc anahweriw iriniwa ka tiperimaritci cota mekotewokoreriw acitc ka kiskinohamakeritci cota aiamihe irakonikewiniw. Kata anwerimiko kitci nipahakaniwite, kaie kata pakitiniko kitci makonakaniwite, aka ka cota iriniwiritci kitci makonikotc. <sup>34</sup>Kata papirotako. Kata iskwatiko.<sup>l</sup> Kata pasakactehoko kirika kata nipahiko. Minawatc ickwa nicto kickokarike kata apitcipaw.»

<sup>i</sup> 10.26 Kekotc: kockomakaniwuwok

<sup>j</sup> 10.33 Arimomitiso ota Cecoc.

<sup>k</sup> 10.33 Kekotc: kata wecimakaniwuw

<sup>l</sup> 10.34 Kekotc: Kata sikowatiko (M)

## Ka ki ici nataweritakik Cak kirika Jean

(Natawapata kaie Matt 20.20-28)

<sup>35</sup>Minawatc Cak kirika Jean, Zébédée okosa e niciritci, pe natawapamewok Cecoca e itatcik: «Okimaw, ni nataweritenan kitci itotiskein kekocic ninan otci, ohwe ke ici nataweritamatak.»

<sup>36</sup>«Kekwan ka ici nataweritamekw kitci totaman kirawaw otci?» itikowok Cecoca.

<sup>37</sup>Aci itewok: «Nete tacikeine kokimawinik e micta icperitakok, pakitinicinan kitci ici apiak waopimera ke ici apiin, peikw kinihiwinik, kotak kinamitciwinik.»

<sup>38</sup>Itikowok Cecoca: «Nama ki kiskeritenawaw anihe ka ici nataweritamekw. Tarasak orakanik ni ka minikwan micta kackeritamowin, kirika tarasak ni ka sikahatason nekatcitawinik. Kirawaw, ki ta kackitanawaw a kitci otci minikweiekw kackeritamowin neta orakanik ke minikwewakeian? Ki ta kackitanawaw a kitci sikahatasoiekw neta nekatcitawinik, mitowi nin ke ici sikahatasoian?»

<sup>39</sup>Itewok: «Ehe, ni ka kackitanan.»

Aci itikowok Cecoca: «Tapwe wirata aci ki ka minikwewakanawaw anihe orakan ke minikwewakeian, kirika ki ka pe otitikonawaw anihe sikahatasowin ke pe otitikoian. <sup>40</sup>Namaiew aric ni nin ke orapamak anahwe ke apitc ninihiwinik kekotc ma ninamitciwinik. Kice Manito ni, aci wir ka ki orapamatc kirika aci ickwa nisawitawew neta ke ici apiritci.»

<sup>41</sup>Ka petaketcik aniki kotakihik Cecoca owitcewakana aniheriw ka ki ici nataweritamiritci Cak kaie Jean, ki kiciwasiwok. <sup>42</sup>Aci kaskina wicamew Cecoc owitcewakana e tca witamowatc: «Ki kiskeritenawaw ohwe e icinakok: Tawok okimawok ota askik e tiperimatcik iriniwa, mocak e witamowatcik ke itotiskeritci. Kiskeritamiriwa kirawe e mackowisitcik patok wirawaw. <sup>43</sup>Nama aric nte isparin kirawaw otci. Kecpin peikw nta e taciekw wi kicteritakosite, acteriw kitci atoskektatakw, mia arotakan. <sup>44</sup>Kaie kecpin wi nikanickate, acteriw kitci arotakaniwitc, kaskina awiriw kitci atoskektowatc. <sup>45</sup>Nama meka ki otci pe icaw Iriniw Okosa<sup>m</sup> kitci atoskektowakaniwitc, aric ma kitci atoskektaketc kirika kitci pakitinak opimatisiwin, micta mitcet iriniwok kitci wikotcihakaniwitcik.»

## Bartimée

(Natawapata kaie Matt 20.29-34; Luc 18.35-43)

<sup>46</sup>Aci Jéricho otenak ki takocinok Cecoc kirika owitcewakana. Minawatc neta ki otcí matcawok, mitcet iriniwa e nosanehokotcik. Tapan neta iriniw aka e wapitc. Bartimée icinikasopan, Timée anihi okosa. Anahwe Bartimée tcikiskanak taci apipan e nato-tamatc. <sup>47</sup>Kek petakew: «Cecoc, Nazareth ka otcitc, takocin.»

Ki tepwew: «Cecoc, Okimaw Tapit Okosa,<sup>n</sup> kitimakerimici!»

<sup>48</sup>Mitcet iriniwa kitotiko e itikotc aka awocamec kitci kitotc. Aric kirawe kiapatc ketin tepwew e itetc: «Okimaw Tapit Okosa, kitimakerimici!»

<sup>49</sup>Aci Cecoc nokikapowiw, e itetc: «Wicamakw.»

Aci natcipahewok anihi aka ka wapiritci e itatcik: «Sokitehe. Pasiko. Ki wicamikowin.»

<sup>50</sup>Aci motcik iciwepinam okapotowan anahwe Bartimée e pasikopatatc e natcikapowictowatc Cecoca. <sup>51</sup>Aci itiko: «Kekwan ka nataweritaman kitci totaman kir otcí?»

«Okimaw, itotiske kiapatc kitci wapian.»

<sup>52</sup>Itew Cecoc: «Matca. Aci ki mirwatisin, e ki asperimototowiin.»

Tecikotc ki iti wapiw. Ki iti nosanehwew Cecoca ka iti matcaritci meskanak.

## Jérusalem otenak e icatc Cecoc

(Natawapata kaie Matt 21.1-11; Luc 19.28-40; Jean 12.12-19)

**11** <sup>1</sup>Mekwata Cecoc kirika owitcewakana icawakopan nete Jérusalem otenak. Nete iti takocinok matinacik Mont des Oliviers ka icinikaterik, pecotcik nte otenacik Bethfagé kirika Béthanie ka icinikateki.<sup>o</sup> Aci nicw owitcewakana iciticohwew kitci nikanickaritci, e itatc: <sup>2</sup>«Icakw nete otenacik, nitatawok ka takok. Takociniekw nete ki ka wapamawaw atikocic e takopisotc, aka moci awik e ki otcí okitapitc ospiskonirik. Ki ka apikonawaw. Ote tca ki ka pecowawaw! <sup>3</sup>Kecpin tca kokwetcimikoiekwe, 'Kekwan wetci totamekw,' ki ka itanawaw, 'Teperitciketc wi apatcihew. Tecikotc minawatc kata pe kiweticohwew ota.'»

<sup>n</sup> 10.47 Wi itemakanotake: otaniskotape osima

<sup>o</sup> 11.1 Nakewar nte Jérusalem otenak ici takono anihi otenacica.





*Jérusalemik e pitaketc Cecoc, atikocicik e okitapitc*

<sup>4</sup>Aci matcawok aniki iriniwok. Ki miskowewok atikocica e takopisoritci mictikok ickwatemik mikiwamik. Ki apikonewok. <sup>5</sup>Atita iriniwa neta ka tacikerispana ki kokwetcimikowok: «Tan e totamekw? Kekwan wetci ki apikonekw anahwe atikocic?»


<sup>6</sup>Ki witamowewok aniheriw ka ki iteritci Cecoca. Ki tca pakitina-kaniwiwok kitci matceworatcik anihi atikocica. <sup>7</sup>Ki iciwotowewok Cecoca. Ki actawok okapotowaniwaw ospiskonirik anihi atikocica. Ki okitapiw nta Cecoc. <sup>8</sup>Mitcet iriniwok tacowekititawakopan okapotowaniwaw motcik ite ke ici takoskeritci anihi atikocica. Kotakihik, cikopiwa aiarawakopan motcik okitikan askiwak itekera ka ki mawotcihatcik. <sup>9</sup>Aniki ka nikanickowatcik Cecoca neta meskanak kirika kotakihik ka nosanehwatcik tepitepwewok e aitetcik: «Mirwatcimatan Kice Manito! Caweritakosiw anahwe ka ki pe iciticohokotc Teperitcikeritci! <sup>10</sup>Kitci caweritak Kice Manito aniheriw Okimawiniw ka otcitciparinik, kotawinapan<sup>p</sup> Tapit aniheriw okimawin! Kicterimatan Kice Manito, wakwek ka taciketc!»

<sup>11</sup>Aci Cecoc ki pitakew neta Jérusalem otenak. Minawatc nete ki pitakew kitci aiamihe mikiwamik. Ka ickwa kaskina wiec aitapitc, ki matcaw kirika anahweriw owitcewakana, nete e icatc Béthanie otenacik, osam aci e akwaskowarik.

### **Waminatikwa e anwerimatc Cecoc**

*(Natawapata kaie Matt 21.18-19)*

<sup>12</sup>Minawatc kecikarik, aci e iti matcatcik neta Béthanie otenacik, aci wi mitciso Cecoc. <sup>13</sup>Warawik otci wapamew peikw



*Iriwot e atawetcik omemewa*

waminatikwa e nipiciwiritci.<sup>q</sup> Ekoni e ici natawapamatc e nta kiskerimatc e apitc owaminimiritena. Aric ka pecowapamatc anihi mictikwa, tepirak nipiciriw wapatam. Nama meka moci aistakonipan kitci owaminimiritci. <sup>14</sup>Aci itew Cecoc anihi waminatikwa: «Nama wiskat aci awik kata mowew kiwaminima.» Ki petako anihi owitcewakana.

### **Kitci aiamihe mikiwamik e orowiticohowetc Cecoc**

*(Natawapata kaie Matt 21.12-17; Luc 19.45-48; Jean 2.13-22)*

<sup>15</sup>Aci minawatc takocinok neta Jérusalemik. Kitci aiamihe mikiwamik ki pitakew Cecoc. Ekoni e ici orowiticohowetc iriniwa ka ataweritci neta kaie ka otapinasoritci.<sup>r</sup> Acikitci wepinam kaskina mitcisowakaniw neta ka ici apitcik iriniwok ka meckotanakik coriariw, kirika e acikitci wepinak otetapiwakaniwariw anahweriw iriniwa ka ataweritci omemewa. <sup>16</sup>Nama kaie awiriw ki otci pakitinew kitci miwotaritci kekociciriw e capotoweckamiritci neta kitci aiamihe mikiwamik. <sup>17</sup>Minawatc ki kiskinohamowew e itatc: «Itemakan Kice Manito Omasinahikanik:

<sup>q</sup> 11.13 Mia itemakan e emitikocictek: un figuier

<sup>r</sup> 11.15 Otapinewakopan awesisa kitci ki aiamihe pakitinakaniwonik Kice Manito otci, acitc pimiteriw, minicaporiw acitc ciwotakaniw.



*Cecoc e orowiticohowetc kitci aiamihe mikiwamik*

‘Kata icinikaticatew nimikiwam  
aiamihe mikiwam kaskina iriniwok otc.’<sup>s</sup>

*Ésaïe 56.7*

Aric kirawaw ki ki ocitanawaw mia kimotiwokiwam kitci  
icinakok.»


<sup>18</sup>Ka petakik aniheriw ka ki isparinik aniki ka tiperimatcik  
cota mekotewokorewa acitc ka kiskinohamaketcik cota aiamihe  
irakonikewiniw, natowi totamopanak kitci ki nipahakaniwiritci  
Cecoca. Tapwe wirata koctepanak. Kaskina meka iriniwok ki  
micta mamiskateritamok aniheriw ka ki ici kiskinohamakeritci  
Cecoca.

<sup>19</sup>Wetakocinik Cecoc kirika owitcewakana ki otc matcawok neta  
otenak.

### **Waminatikw e pasotc**

*(Natawapata kaie Matt 21.20-22)*

<sup>20</sup>Minawatc kecikarik, wipatc kecepawonik, mekwata e pimo-  
tetcik meskanak, aci wapamewok anihi waminatikwa. Tekaci  
pasoriw, wawatc kaie otapik. <sup>21</sup>Aci mikawiw Pien ka ki  
iciwepanik. Itew Cecoca: «Okimaw, kanawapami anahwe  
waminatikw ka ki anwerimatc. Tekaci paso.»

*E aiamihatc iriniw*

<sup>22</sup>Aci itew Cecoc anahweriw owitcewakana: «Tapwe ohwe ka witamatakok. Asperimototowakw Kice Manito! <sup>23</sup>Kecpin awik itate aniheriw matinaciciriw, 'Atcitica nta, pakope kwackoti nta nipik,' kecpin aka e anwetak otehi, e tapwetak tca aniheriw ka ki itetc kitci isparinik, tapwe kata ispariniw, wir otci. <sup>24</sup>Ekoni wetci ititakok: Mekwata e aiamihaiekw, kekociciriw e nataweritamowekw Kice Manito, tapwetamokw kitci pe otitikoiekw. Tapwe ki ka mirikowinawaw. <sup>25</sup>Kaie mekwata e nanipowiekw e aiamihaiekw, kecpin tca wiew e iterimekw awik e ki matci totatak, ki ka ponerimawaw,<sup>t</sup> kitci ki kaie wir kasihamatak Kotawiwaw wakwek ka taciketc. [<sup>26</sup>Kecpin aric aka ponerimekwe kiwitec iriniwaw,<sup>u</sup> nama kaie kirawaw ki ka kasihamakowaw Kotawiwaw wakwek ka taciketc.]]<sup>v</sup>

### **Tante wetciparinik Cecoc otiperitamowin**

*(Natawapata kaie Matt 21.23-27; Luc 20.1-8)*

<sup>27</sup>Minawatc ki icawok kiapatc Jérusalemik. Mekwata e pimotetcik neta pitakamik kitci aiamihe mikiwamik, aci pe natawapamiko Cecoc anahweriw ka tiperimaritci cota mekotewokoreriw kirika ka kiskinohamakeritci aiamihe irakonikewiniw acitc cota aiamihe okimawa, <sup>28</sup>e tca kokwetcmikotc:

<sup>t</sup> 11.25 Kekotc: ki ka kasihamowawaw

<sup>u</sup> 11.26 Kekotc: aka kasihamekwe kiwitec iriniwaw

<sup>v</sup> 11.26 Nama takon ohwe mitcet weckatc masinahikanik.



«Witamacinan, tante wetciparik kitiperitamowin kitci itotiskein? Awin ka ki mirisk aniheriw?»

<sup>29</sup>Itew Cecoc: «Peikw kekocic ki ka kokwetcimitinawaw. Kecpin naskamowiekwe, ki ka witamatinawaw nte wetciparik nitiperitamowin kitci itotiskeian: <sup>30</sup>Awin ka ki pe iciticohwatc Capatisa kitci pe nta sikhatakeritci? Kice Manito kekotc ma iriniwok? Witamacikw.»

<sup>31</sup>Aric tepirak taci aimihitowok e aititotcik: «Kecpin iteikwe, 'Kice Manito ni ka ki pe iciticohwatc,' ki ka kokwetcimikono, 'kekwan tca wetci aka ki otci tapwerimekw Capatis?' <sup>32</sup>Kecpin aric iteikwe, 'iriniwok ka ki pe iciticohwatcik'....» (Koctepanak anihi iriniwa e micta mitcetiritci. Ki tapweritamiriwa meka tapwe e ki pe iciticohwakaniwitc Capatis kitci pe nikan tipatcimotc.)

<sup>33</sup>Aci itewok aniki okimawok Cecoca: «Nama ni kiskeritenan.»

Aci kaie wir itew Cecoc: «Ka! Nama meka tca kaie nin ki ka witamatinawaw nte wetciparik nitiperitamowin kitci itotiskeian!»

### Matci kitike iriniwok

(Natawapata kaie Matt 21.33-46; Luc 20.9-19)

**12** <sup>1</sup>Ekoni e ici aimihatc anahweriw iriniwa Cecoc, atisokan-  
niciciriw e apatcitatc: «Weckatc tapan peikw iriniw,



*Mikiwamicic e icpaskahak, warawik kitci ki wapatcikatek  
e nanakatcitakaniwok kitikan aski*

cweminatikwa e kitiketc okitikan askik. Ki waskaskoham. Ki waratawokahikew, cweminak ke ici arakaniwitcik kitci ki camakohwakaniwitck, kirika ki ocitaw mikiwamiciciriw e icpaskahak, warawik kitci ki wapaticaterik e nanakatcitakaniwonik okitikan aski. Ki awihew aniheriw otaski kitike otamiro iriniwa. Ekoni e ici matcatc, kotak askik e icatc e pamatisitc. <sup>2</sup>Kek wetcitciparinik kitci mawotcitakaniwonik kitikaniw, aci iciticohwew peikw otarotakana kitci natawapamaritci anahweriw otamiro iriniriw kitci ki mirikotc irikik cwemina ka acterikipan kitci mirakaniwitc e ki awihiwetc otaski. <sup>3</sup>Aric anahwe ka ki iciticohwakaniwitc ki makoniko anahweriw otamiro iriniwa. Ki macikako. Ki tca kiweticohoko, aka kekociciriw e mirikotc. <sup>4</sup>Minawatc anahwe iriniw ka tiperitak aniheriw kitikan askiriw iciticohwew kotakihi otarotakana. Peikon anahwe arotakan ki otamictikwanihiko anahweriw otamiro iriniwa, e micta marerimikotc. <sup>5</sup>Minawatc anahwe ka tiperitak iciticohwew kiapatc kotakeriw iriniwa. Anihi tca ki nipahakaniwiriw. Kiapatc mitcet arotakanak iciticohwakaniwiwok. Peikon ka ki totowatcik aniki otamiro iriniwok. Atita ki macikowewok. Kotakihi ki nipahewok. <sup>6</sup>Nac tepirak peikociriw aka moci ka ki otcic iticohwatc anahwe ka tiperitak, tipirawe okosa e peikociritci e micta sakihatc. Aci anihi mamitcic iticohwew e iteritak, 'Otcitakotc nikosa kata kicterimewok.' <sup>7</sup>Aric e wapamatcik aniki otamiro iriniwok e takociniritci, aci aititowok,



*Cweminak ke ici cimakohwakaniwitcik, minicaporiw kitci ocitakaniwonik*

‘Enko anahwe ke tiperitak nanake. Matcatan. Ki ka nta nipahano. Kirano tca ki ka tiperitenano ohwe aski.’ <sup>8</sup>Ki makonewok anihi okosiriw okimamiwawa. Ki nipahewok. Ekoni e ici orowepi-namwatick owiariw nete kitikan askik.»

<sup>9</sup>Aci kiapatc kokwetcikemo Cecoc e itetc: «Kiskeritake aniheriw ka ki isparinik anahwe ka tiperitak okitikan aski, tan ke totowatc anahweriw otamiro iriniwa? Kata pe icaw. Nama kata mana nipahew. Kotakihi iriniwa kata awihew aniheriw okitikan aski.

<sup>10</sup>Ki kiskeritenawaw e itemakanik Kice Manito Omasinahkan:

‘Anihi asiniwa ka ki wepinatick manike iriniwok,  
enkweriw aci ka mawotci kictapatisiritci.

<sup>11</sup>Wir Teperitciketc ka ki totak.

Ki micta mirwinamwano.’ »

*Psaume 118.22-23*

<sup>12</sup>Aci aniki cota okimawok micta natowi totamok kitci ki makonakaniwiritci Cecoca. Ki kiskeritamok meka wirawaw e arimomakaniwiticik aniheriw ka iteritci e atisokeritci. Aric kiapatc ki koctewok anihi iriniwa e micta mitcetiritci. Ki tca nakatewok Cecoca. Ki matcawok.

### **E kicikowakaniwitc kice okimaw**

*(Natawapata kaie Matt 22.15-22; Luc 20.20-26)*

<sup>13</sup>Aci ki iciticohwakaniwiwok atita Pharisien iriniwok kirika atita ka atoskectowatick okimawa Hérode kitci nta kokwetcimatcic Cecoca. Wikokwe paciwarewakopan arotc kitci iteritci, kitci ki tca takonik ke ki otci itactahorakaniwiritci.<sup>w</sup> <sup>14</sup>Aci natawapamewok



*Comarike, kice okimaw otactamikw e nokonik*

<sup>w</sup> 12.13 Kata takoniw meka kitci itactahorakaniwitc, kecpin pitoc itete kirika cota aiamihe irakonikewiniw.

e tca itatic: «Okimaw, ni kiskeritenan tapwe mia e itein. Nama ki pameritamwan tan e iterimisk awik. Nama wawatc ki pameriten kecpin awik e iterimakaniwitec 'micta kicteritakosiw'. Mia ki kiskinohamakan e ici nataweritak Kice Manito. Witamacinan tca tan e itemakak kitaiamihe irakonikewininak: Mirwacin a e kicikamokw e mawotciticikaniwok Romain kice okimaw otci? Actew a kitci kicikamokw kekote nama?»

<sup>15</sup>Aric kiskerimepan Cecoc e kasoritci tapwe e ici iteritamiritci. Ki tca itew: «Kekwan wetci wikokwe paciworiekw? Petakw ote peikw comarike kitci wapataman.»

<sup>16</sup>Ki tca nta iciwotowewok peikw aniheriw comarikeriw. Aci Cecoc kokwetciw e itatic: «Awin neta ka nokonik otactamikw kirika ka masinaterik oticinikasowin?»

«Kice okimaw,» itewok.

<sup>17</sup>Aci itew Cecoc: «Ki ka meka tca mirawaw kice okimaw ka ici tiperitak, kaie Kice Manito ki ka mirawaw wir ka ici tiperitak.» Ki micta mamiskasitowewok.

### **Ka nipotcik e apitcipaticik**

*(Natawapata kaie Matt 22.23-33; Luc 20.27-40)*

<sup>18</sup>Atita iriniwok, Sadducéen iriniwok ka icinikatakaniwiticik, ki pe natawapamewok Cecoca. Enko aniki cota iriniwok ka ici tapweritakik, nama kata apitcipawok ka nipotcik. Ekoni e ici kokwetciw e itatic: <sup>19</sup>«Okimaw, weckate kimocominapan Moïse ohweriw ki masinaham otirakonike masinahikanik:

'Kecpin iriniw e nipowitec, e taritci ocima, e tca nipote, e nakatate tca okoma, aka e ki otci onitcaniciritci, acteriw ocima kitci nipowiritci anihi owitimoriw ka cikawiritci kitci tca onitcaniciticik, octesa otci ka ki niporitci.' »

*Deutéronome 25.5-6*

<sup>20</sup>Kiapate aniki Sadducéen iriniwok itewok: «Peikwaw nicowaso (7) tacipanak ockinikiwok e owitcicanitotcik. Anahwe ka mawotci kiceatisite ki nipowiw. Ki tca nipo, aka e ki otci taritci onitcanica.

<sup>21</sup>Kotak tca anahwe ockinikiw ki nipowiw anihi owitimwa. Kaie wir ki nipo, aka e ki otci taritci onitcanica. Minawate kiapate kotak peikon mia kaie wir ka ki isparite. <sup>22</sup>Nac kaskina kotakihik ka owitcicanitotcik ki iti nipowiwok anihi owitimowawa, aka tca otci peikw e ki otci taratic awaca. Kek kaie wir ki nipo anahwe cikaw. <sup>23</sup>Nikotin tca apitcipatawe aniki ka ki nipotcik, awin ni mia



ke okomitc, anihi kaskina e nicowatciticik e ki iti nipowitcicik anihi iskwewa?»

<sup>24</sup>Itikowok Cecoca: «Arotc kit iteritenawaw, osam aka e tipi miro kiskeritamekw Kice Manito Omasinahikan. Nama kaie ki kiskeritenawaw e apitc mackowisitc Kice Manito. <sup>25</sup>Tapwe wirata, apitcipatawe ka nipotcicik, nama kata nipowiwok iriniwok kirika iskwewok. Kata ici matisiwok mitowi aceriwok e ici matisitcicik nete wakwek. <sup>26</sup>Arimotcikatew nete Moïse omasinahikanik kitci apitcipatcicik ka nipotcicik. Nama wiskat a ki ki otci tapwatanawaw nete e arimotcikatek ka ickotewok e sakatikak? Masinatew meka neta, Kice Manito e ki itatc Moïsa:

‘Nin Abraham Okice Manitoma, kaie Isak, acitc Cakop.’ »<sup>x</sup>

*Exode 3.6*

<sup>27</sup>Kiapatc itew Cecoc: «Kice Manito anahwe, ka pimatisitcicik ni iriniwok Okice Manitomiwaw, namaiew ni ka nipotcicik. Ekoni wetci iteian, tekaci arotc kit iteritenawaw.»

### **Irakonikewin ka mawotci kicteritakok**

*(Natawapata kaie Matt 22.34-40; Luc 10.25-28)*

<sup>28</sup>Peikw iriniw ka kiskinohamaketc cota aiamihe irakonikewiniw ki petowew e taci aimihitoritci anahweriw iriniwa. Ki petowew Cecoca wewerita e naskamowaritci anahweriw Sadducéen iriniwa. Ki natcikapowictowew Cecoca e tca kokwetcimatc: «Kekw irakonikewin ka mawotci kicteritakok neta cota irakonikewinik?»

<sup>29</sup>Aci itiko Cecoca: «Enko ohwe ka mawotci kicteritakok:

‘Natotamokw Israël iriniwok:

Teperitciketc Kikice Manitomino,  
enke anahwe tepirak ka tiperitciketc.

Nama taw kotak.

<sup>30</sup>Ki ka sakihaw Teperitciketc Kikice Manitom

kaskina e irikokotehein,

kaie tekaci kitciticakocik,

acitc kimitoneritcikanik,

kaie irikik e ici mackowisiin.’

*Deutéronome 6.4-5*

<sup>31</sup>Minawatc tca enko ohwe kotak irakonikewin ka kicteritakok:

‘Ki ka sakihaw kiwitc iriniw

mitowi kir ka asitci sakihitisoin.’

*Lévitique 19.18*

Nama takon kotak irakonikewin kirawe e kicteritakok, enko tepirak anihi e niciki.»

<sup>32</sup>Anahwe ka kiskinohamaketc cota aiamihe irakonikewiniw itew Cecoca: «Okimaw, kaskina ka ki itein ki tapwan. Teperitciketc, enko tepirak ka kice manitowitc. Nama taw kotak. <sup>33</sup>Acteriw iriniw kitci sakihatc Kice Manito kaskina e irikokotehetc, kaie tekaci omitoneritcikanik, acitc irikik e mackowisitc, kirika kata sakihew owitc iriniwa mitowi e asitci sakihitisotc. Kirawe mictahi mirwapatan anihe patok kitci cawerimakaniwitc Kice Manito awesisa e ickwaswakaniwiritci e aiamihe pakitinikaniwonik kaie kotakeriw kekociciriw e ici cawerimakaniwitc.»

<sup>34</sup>Cecoc kiskerimew wewerita e ki naskamoritci. Itew tca: «Ki pecowapaten Kice Manito Okimawin.» Ka ickwa aitetc aniheriw, nama awik aci wi kokwetcimew kekociciriw.

### **Anahwe ka ki pe iciticohokotc Kice Manito kirika Okimaw Tapit**

*(Natawapata kaie Matt 22.41-46; Luc 20.41-44)*

<sup>35</sup>Minawatc mekwata e kiskinohamakespan Cecoc neta kitci aiamihe mikiwamik, ki kokwetcikemo e itetc: «Kekwariw wetci itetcik aniki ka kiskinohamaketcik cota aiamihe irakonikewiniw, ‘Krist, anaha Kice Manito ka ki itetc kitci pe iciticohwatc kitci akwacimaritci iriniwa, enkweriw okimaw Tapit otaniskotape osima’?» <sup>36</sup>Wir tipirawe meka Tapit ki masinham ohweriw, Miro Manito e witcihikotc:

‘Teperitciketc Kice Manito ki itew anihi ka tiperimimitc,  
pe nta api ninihiwinik,  
nac kaskina kitci tepahakik ka cikerimiskik,  
kir tekaci kitci tiperimatcik.’

*Psaume 110.1*

<sup>37a</sup>Tapit kaie wir icinikatew anihi ‘anahwe ka tiperimitc’. Tan tca e isparik kitci ki otaniskotape omocomitc anahwe Krist ka icinikatakaniwitc, anihi Tapita?»

### **Irinuwok e wi kicterimikositcik**

*(Natawapata kaie Matt 23.1-36; Luc 20.45-47)*

<sup>37b</sup>Miro natotakopan Cecoc anihi iriniwa e mitcetiritci. Mirotakokopan. <sup>38</sup>Aci kiapatc kiskinohamowepan e itatc: «Aiekwamictowakok aniki ka kiskinohamaketcik cota aiamihe irakonikewiniw, ka micta

ko mireritakik e pamotetcik, okapotowaniwaw ka kinekinik e pa apatcitatcik e wi kicterimikositcik, kirika e mireritakik ko e arimikowakaniwitcik taci e ici mitcetinaniwonik. <sup>39</sup>Ke ici miro nokositcik ici aipiwok cota aiamihe mikiwamik, kaie nete ka ici makocaniwonik, ka mawotci mirwacinik apiwinik ici apiwok. <sup>40</sup>Kimotimewok cikawa kaskina e ici tatamiritci. Peikon ko kinec aiamihawok, tepirak kitci iterimakaniwitcik 'micta aiamihatisiwok'. Enko aniki ke mawotci anwerimakaniwitcik!»

### **Cikaw ka ki pakitiniketc**

*(Natawapata kaie Luc 21.1-4)*

<sup>41</sup>Cecoc ki nta aipiw neta pecotcik e ici acterik pweteriw, taci neta e pakitinakaniwonik kitci aiamihe mikiwamik. Ki nanakatcihew mitcet iriniwa tan e ici pakitinikeritci. Mitcet micikita iriniwok micta nipara ki pakitinamok ocoriamiwaw. <sup>42</sup>Kek takocin cikaw orina e kitimakisitc. Ekoni e ici pakitinak nicw comarikeciriw. <sup>43</sup>Aci wicamew Cecoc kaskina anihi owitcewakana kitci pe natcikapowictakotc, e tca itatc: «Tapwe ohwe ka witamatakok: Kirawe nipara pakitinam anahwe cikaw ka kitimakisitc patok kaskina aniki kotakihik iriniwok. <sup>44</sup>Osam meka micikita iriniwok pakitinamok tepirak ka ici ickoparitcik. Aric anaha iskwew, kaskina ki actaw neta pwetek ke ki otci pimatisiwakespan.»

### **E nikan tipatcimotc Cecoc kitci orapatcikaterik kitci aiamihe mikiwamiriw**

*(Natawapata kaie Matt 24.1-2; Luc 21.5-6)*

**13** <sup>1</sup>Aci e iti orowitc Cecoc nta kitci aiamihe mikiwamik, peikw owitcewakana itiko: «Okimaw, kanawapata! Micta micapiskisiwok aniki asiniik! Micta kice mirwacino kaskina anihi ka ki otci ocitakaniwoki!»

<sup>2</sup>Aci itew Cecoc: «Ki wapaten a kaskina anihi ka ki ocitakaniwoki e micta micaki? Kecko nama kata otci peikociw asini kitci okitcicik kotak asinik. Kaskina kata oraparin.»

### **Ke ici matciparinaniwok acitc ke ici nekatcitaniwok**

*(Natawapata kaie Matt 24.3-14; Luc 21.7-19)*

<sup>3</sup>Ki nta aipiw Cecoc nte matinak Oliviers ka icinikaterik, tipickotc nte kitci aiamihe mikiwamik e ici takonik, tepirak anahweriw owitcewakana Pien, Cak, Jean kirika Atre e witcewikotc. Aci kokwetcimiko: <sup>4</sup>«Witamacinan, tan apitc anihe ke isparik? Tan nta ke otci nisitowinamak mia ke iciwepak kaskina ka itein?»



*Kitci aiamihe mikiwam e oraparik*

<sup>5</sup>Itew Cecoc: «Aiekwamisikw aka kitci paskeworitakw awik.  
<sup>6</sup>Mitcet iriniwok kata takocinok kitci tca itetcik, 'Nin ni Kice Manito ka ki pe iciticohwitc. Nosanehoci tca!' Micta mitcet iriniwa kata paskeworewok. <sup>7</sup>Petamekwe pecotcik e natoparinaniwok, kaie petakeiekwe e natoparictatonaniwok warawik kotakihi askik, akawir kocatcikw. Actew kitci icinakok. Nama aric ni moci kata ponaskiwon. <sup>8</sup>Kecko kaie iriniwok peikw askik e taciketcik kata nta mowinehewok kotakihi iriniwa kotak askik e tacikeritci. Peikw okimaw kata nta natoparictowew kotakihi okimawa. Kata micta kwekon atita papitoc askik, kaie kata kokataniwon. Mitowi iskwew e iti akositc e onitcanicitc, ekoni ke apitc arimiparik.»

<sup>9</sup>«Aric kirawaw, nanakatchitisokw! Ki ka makonikowinawaw, tipaskonike irinik kitci iciworikoiekw. Ki ka macikakowinawaw neta cota aiamihe mikiwamik. Ki ka nta iciworikowinawaw okimak kaie kice okimak osam e tapwerimiekw. Aci ki ka tipatci-monawaw ka ki totaman. <sup>10</sup>Enko anihe meka nictam ke isparik: kaskina iriniwok ota askik kata tipatcimoctowakaniwiwok ohweriw Miro Tipatcimowiniw.»

<sup>11</sup>«Makonikoiekwe kitci iciworikoiekw neta tipaskonike irinik, akawir kicadc arimeritamokw ke iteiekw. Apitc witamakoiekwe kitci naskamoiekw neta, tepirak anihe ke mirikoiekw kitci iteiekw ki ka itanawaw. Namaiew ni meka kirawaw tipirawe ke aiarimweiekw. Miro Manito ki ka mirikowaw aniheriw mia ke aiteiekw.»

<sup>12</sup>«Atita iriniwok kata pakiterimewok tipirawe octesiwawa kekotc ma ocimiwawa kitci ki nipahakaniwiritci. Peikon atita



ke totowatcik tipirawe onitcaniciwawa. Matci atita awacak kata wepakonewok onikihikowawa, nac kitci nipahakaniwiritci.  
<sup>13</sup>Kaskina iriniwok ki ka cikerimikowawok, osam e nosanehwiekw. Aric anahwe mocak ke nosanehwitc, kata akwacimakaniwiw.»

### **E nikan witak Cecoc kitci micta nekatcitaniwonik**

*(Natawapata kaie Matt 24.15-28; Luc 21.20-24)*

<sup>14</sup>«Ki ka wapamawaw anahwe ka icinikatakaniwitc ‘ka micta kice maratisitc’. Kata arakaniwiw neta aka tekaci e ici acterik kitci apitc. (Anahwe ka tapwatciketc acteriw kitci miro nisitotak ohweriw.) Aci aniki ka taciketcik Judée askik nte kata ici ocimowok kaskina wiec e ici matinarik. <sup>15</sup>Anahwe ke apitc ani apitc okitc omikiwamik, nama acteriw kitci nitatowitc kitci natcipatatc aniheriw ka ici tatak kitci matcewotatc. <sup>16</sup>Kaie anahwe okitikan askik ke pa otamirotc, nama acteriw kitci kiwetc omikiwamik kitci natcipatatc okapotowan. <sup>17</sup>Ani apitc aici kicikarike kata micta nekatcitawok iskwewok ka kanawerimawasotcik kaie aniki ke nocanehawasotcik. <sup>18</sup>Pakoserimakw Kice Manito aka kitci aisparik mekwata e pipok. <sup>19</sup>Kecpin meka ani aici kicikake, kirawe kiapatc kata nekatcitaniwon patok kaskina ka ki ici kiskeritcikatek e nekatcitaniwok esko ki pe takok aski, ka kitciparitc Kice Manito e kiceritak kaskina kekociciriw nac anotc. Nama kaie wiskat minawatc kata asitci nekatcitaniwon. <sup>20</sup>Kecpin aka ki otci iteritak Teperitciketc kitci atciwonak irikik ka tatinikipan kicikoriw ke nekatcitaniwonikipan, nama awik kata pimatisipan. Aric ki atciwonam anahweriw otci iriniwa ka ki orapamatc kitci iteritakosiritci otirinima. <sup>21</sup>Kecpin tca awik ititakwe, ‘Kanawapami, enkweriw Kice Manito ka ki itetc kitci pe iciticohwatc kitci ki akwacimiweritci,’ kekotc ma kecpin itete, ‘Enko anaha ka pa taciketc,’ akawir tapwetakw. <sup>22</sup>Kata micta mitcetiwok meka ke itetcik, ‘Kice Manito ni, ka ki pe iciticohwitc.’ Kaie wirawaw ke nikan tipatcimokasotcik Kice Manitowa otci kata pe takocinok. Kata mata kackitawok. Kata matawo aitotamok e natowi aitotakik kitci kokwe wecimatick iriniwa ka ki orapamikoritci Kice Manitowa, kecpin e kackitatcik. <sup>23</sup>Kirawaw tca, aiekwamisikw! Kaskina meka kicatc ki witamatinawaw.»

### **Ke isparinik minawatc pe takocike Iriniw Okosa**

*(Natawapata kaie Matt 24.29-31; Luc 21.25-28)*

<sup>24</sup>«Ani apitc iciwepake, ickwa nekatcitaniwoke, nama kata nokosiw kicikaw pisimw, kaie tipiskaw pisimw nama kata



*Iriwi e mawotcihatc wamina*

wasikew. <sup>25</sup>Atcikocak wakwek kata otc papakicinok. Kaskina aniki kicikaw pisimw, tipiskaw pisimw kaie atcikocak kata ninikipariwok. <sup>26</sup>Kata tca wapamakaniwiw Iriwi Okosa,<sup>z</sup> oskok kitci otc pe nokositc, e micta mackowisitc kaie e micta kicteritakositc. <sup>27</sup>Kata iciticohwew aceriwa kaskina wiec askik e irikokoskamikarik kitci mawotciharitci anahweriw ka ki orapamatc.»

### **Aniheriw ka wi kiskinohamaketc Cecoc e atisokatatc waminatikwa**

*(Natawapata kaie Matt 24.32-35; Luc 21.29-33)*

<sup>28</sup>«Enko ohweriw ka ici kiskinohamaketc waminatikw. E iti mirokarik otikon, kaie e iti sakipakak, ki kiskeritenawaw aci kekat kitci pe nipik. <sup>29</sup>Peikon wapatamekwe anihe kitci isparik, ki ka kiskeritenawaw aci e peconakositc Iriwi Okosa<sup>z</sup> kitci pe takocik. <sup>30</sup>Tapwe ohwe ka ititakok, anotc ka pimatisitcik iriniwok nama moci kaskina kata nipowok epwamoci ani iciwepanik. <sup>31</sup>Wasko kaie aski tekaci kata ickwaparino, aric nititewina nama wiskat kata ickwaparino.»

---

<sup>z</sup> 13.26,29 Arimomitiso ota Cecoc.

## Nama awik kiskeritam apitc ke ponaskiwonik

(Natawapata kaie Matt 24.36-44)

<sup>32</sup>«Nama aric awik kiskeritam tan apitc mia ke takociparinik aniheriw e kicikarik kekotc ma aniheriw ke tato tipahikanearik.<sup>a</sup> Nama wawatc aceriwok wakwek ka taciketcik kiskeritamok, nama kaie anahwe Iriniw Okosa.<sup>b</sup> Wircike tepirak Kotawino kiskeritam. <sup>33</sup>Aiekwamisikw tca! Miro nanakatisikw!<sup>c</sup> Nama meka ki kiskeritenawaw kaie kirawaw apitc mia ke pe iciwepak. <sup>34</sup>Tarasak mia peikw iriniw e wi matcatc, kotak askik e icatc. Epwamoci matcatc, itew kaskina otarotakana kitci mitaritci omikiwam. Mirew tato neta e taciritci ke itotiskeritci mekwata ke itanahotc. Itakaniwiw kaie anahwe ka kanaweritak ickwatemiriw mocak wewerita kitci nanakatcitatc. <sup>35</sup>Kaie kirawaw tca nanakatisikw! Nama meka ki kiskeritenawaw apitc ke takocik kokimamiwaw.<sup>d</sup> Pot e otakocinik kata takocin, kekotc ma mekwata e tipiskarik, kekotc ma e kicepawonik kekotc ma e kicikarik. <sup>36</sup>Kecpin keskat takocike, nama kata mirwacinipan kitci miskatakw e nipaiekw! <sup>37</sup>Ohwe ka iteian, kaskina awik ka itak: Nanakatisikw!»

## Ka kiskinohamaketcik cota aiamihe irakonikewiniw e natowi totakik kitci ki otci makonakaniwiritci Cecoca

(Natawapata kaie Matt 26.1-5; Luc 22.1-2; Jean 11.45-53)

**14** <sup>1</sup>Aci kekat kitci natciparinik kitci mawotcihitotcik cota iriniwok kitci aiamihe makocetcik, wi mirwatatamok aniheriw Pâque ka icinikaterik.<sup>e</sup> Minawatc kiapatc kotakeriw e mirwatciticikaterik kata iti takoniw. ‘Pakwecikan aka ka opisotc’ icinikatew anihe makocan. Aniki ka tiperimatcik cota mekotewo-korewa kirika ka kiskinohamaketcik cota aiamihe irakonikewiniw natowi totamopanak kimotc kitci ki otci makonakaniwiritci Cecoca, kaie kitci nipahakaniwiritci. <sup>2</sup>Taci aititopanak: «Nama ki ka ki makonano mekwata e mirwatciticikaterik.<sup>f</sup> Kwecan ki ta kiciwahanowok iriniwok.»

<sup>a</sup> 13.32 Arimotcikatetake apitc ke ponaskiwok.

<sup>b</sup> 13.32 Arimomitiso ota Cecoc.

<sup>c</sup> 13.33 Kekotc: Aka notekocikw!

<sup>d</sup> 13.35 Mia itemakan: anahwe ka tiperitak mikiwamiriw

<sup>e</sup> 14.1 Mikaweritamowakopan e ki pakitinakaniwiticik e micta nekatcihakaniwaspan nete Égypte askik itekera, Kice Manitowa e ki nanakatcihikotcik.

<sup>f</sup> 14.2 Kekotc: mekwata e makocaniwonik

## **Peikw iskwew e actatc ka miromakonik Cecoca octikwanirik**

*(Natawapata kaie Matt 26.6-13; Jean 12.1-8)*

<sup>3</sup>Minawatc mekwata nete Béthanie otenacik tacikepan Cecoc, nta Simo omikiwamik e taciketc. Anahwe Simo omikiwapinekopan. Mekwata e mitcisospan Cecoc mitcisowakanik, aci iskwew ki pe pitakew, opotariw ka micta mirwacinik e pe takonak, tekaci e mockineperik pimiteriw ka miromakonik, ka micta misakitakonik pimiteriw. Ki pikotaw onoskotc aniheriw opotariw. Pekatc iti sikinamowew Cecoca octikwanirik. <sup>4</sup>Atita ka tacikewaspan kiciwasiwok e ki totamiritci anihi iskwewa, e tca aititotcik: «Ceckwat ki onactaw aniheriw ka miromakonik e micta misakitakonik. <sup>5</sup>Matci kata ki atawepan awik, nictowaw mitato mitina (300) coriawapiskoriw kitci kackitatc,<sup>g</sup> kitci ki tca miraspan ka kitimakisiritci.» Nama nac ponimewok anihi iskwewa.

<sup>6</sup>Aci Cecoc itew: «Ponihakw! Kekwan wetci nekasimekw? Micta mirwaciniw aniheriw ka ki totak nin otci. <sup>7</sup>Mocak kata tawok ka kitimakisitcik ota ka ici tacikeyekw. Tatwaw nataweritamekwe kitci miro totowekok, ki ka kackitanawaw kitci totamekw. Aric nin, nama mocak ni ka tacikan ota. <sup>8</sup>Ki totam anahwe iskwew e ici kackitaspan. Ni ki actamakw ka miromakonik niwiawirik, e nisa-wihite mitikowocik kitci arikoian. <sup>9</sup>Tapwe ohwe ka witamatakok, kaskina wic ke tipatcimonaniwok Miro Tipatcimowin, kata tipatcicikateriw ka ki totak anahwe iskwew. Mocak kata mikawerimakaniwiw.»

### **Judas e wi pakiterimatc Cecoca, cota mekotewokorek e iciwotowatc**

*(Natawapata kaie Matt 26.14-16; Luc 22.3-6)*

<sup>10</sup>Aci anahwe Judas Iscariote ka icinikatakaniwitc, peikw nta ka mitato acitc niciritci owitcewakana Cecoc, ki nta witamowew ka tiperimaritci cota mekotewokoreriw e wi pakiterimatc Cecoca.<sup>h</sup> <sup>11</sup>Micta mireritamok ani e itikotcik. Aci itewok kitci miratcik coriariw. Aci natowi totam Judas tan apitc ke miroparinik kitci ki iciwotowatc, Cecoca kitci pakiterimatc.

---

<sup>g</sup> 14.5 Ani apitc tepirak peikwo coriawapiskoriw kanewikopan ko iriniw peikwo kickwa e otamirotc.

<sup>h</sup> 14.10 Kekotc: e wi wecimac, e wi atawetc





*Judas kirika iriniwok ka tiperimatcik cota mekotekorewa*

### **Mamitcite e witci mitcisomatec owitcewakana Cecoc**

*(Natawapata kaie Matt 26.17-25; Luc 22.7-14,21-23; Jean 13.21-30)*

<sup>12</sup>Aci nictam ohwe e kicikak e mirwatcicikatek, 'Pakwecikan aka ka opisotc' e icinikaticikatek anihe cota makocan, anihe e kicikak e makocaniwok e aiamihe pakitinakaniwitcik maritcenicak kitci ki makocaniwok, Pâque otci,<sup>i</sup> aci kwetcimiko Cecoc owitcewakana: «Tante e ici nataweritaman kitci ici nta ocitaiak makocan?»

<sup>13</sup>Aci nicw owitcewakana iciticohwew Cecoc, e itatc: «Icakw neta otenak. Mekwata e pimoteiekw ki ka nakickowawaw iriniw e miwotatc nipiriw micta opotak. Ki ka nosanehwawaw. <sup>14</sup>Pitakete mikiwamik, ki ka itawaw neta ka tiperitak mikiwamiriw, 'Okimaw wi kiskeritam tante e ici takonik aniheriw aricapiriw ke taci mitcisoiaik, wir kirika owitcewakana.' <sup>15</sup>Ki ka wapatahikowaw icpimitakok omikiwamik micta aricapiriw, kaskina kekociciriw e takonik, aci e ki nisawinaniwonik kitci icaikw. Ekota tca neta ke ocitaiekw makocan.»

<sup>16</sup>Aci matcawok aniki Cecoc owitcewakana, otenak e icatcik. Tekocikik neta otenak, kaskina mia ki icinakoniw, kaskina ka ki aiteritci Cecoca. Ki tca ocitawok makocaniw.

<sup>17</sup>E iti otakocinik, Cecoc takocin neta kirika owitcewakana e witcewikotc. <sup>18</sup>Mekwata e aipitcik mitcisowakanik e taci

---

<sup>i</sup> 14.12 Ani apitc, tatwaw peikwo pipona, ani e kicikarik, nipahewakopan ko cota iriniwok maritcenica kitci makocetcik.

mitcisotcik, aci itew Cecoc: «Tapwe ohwe ka witamatakok, peikw neta e taciekw e witci mitcisomiekw, ni ka pakiterimikw.»<sup>j</sup>

<sup>19</sup>Micta kackeritamiriwa anahweriw owitcewakana. Kokwetcimiko aiackotc: «Namaiew nin, taina?»

<sup>20</sup>Aci itew Cecoc: «Anahwe ke totak, enko anahwe peikw neta mitato acitc nicw e taciekw ka akotcimac opakwecikanima kirika nin peikon orakanik e akotcimak nin nipakwecikanim.

<sup>21</sup>Tapwe kata nipo Iriniw Okosa,<sup>k</sup> kotc ka itacterik Kice Manito Omasinahikanik. Aric kata micta matcipaririw anihi iriniwa ke pakiterimikotc anahwe Iriniw Okosa. Kirawe kata ki miroparini-pan keepin aka ki otci nitawikiritci anihi iriniwa.»

### Nictam ka kominiwinaniwok

(Natawapata kaie Matt 26.26-30; Luc 22.14-20; 1 Cor. 11.23-25)

<sup>22</sup>Mekwata e mitcisotcik, Cecoc ki otapinew pakwecikana. Ki aiamihaw, mikwetc e itatc Kice Manitowa. Ki pakwepitew. Ki mamirew owitcewakana, e itatc: «Mowikw ohwe. Enko ni niwiaw.»

<sup>23</sup>Minawatc ki otapinam peikwo orakan minicaporiw. Kiapatc mikwetc ki itew Kice Manitowa. Minawatc mameckotc ki mirew anihi owitcewakana kitci minikweritci. <sup>24</sup>Kiapatc ki itew: «Enko ohwe nimikw ka minikweiekw. Ekoni ke otci kiskeritakok e ki



*Mamitcic e witci mitcisomitotcik Cecoc kirika owitcewakana*

<sup>j</sup> 14.18 Kekotc: ni ka wecimikw

<sup>k</sup> 14.21 Arimomitiso ota Cecoc.

koski orictatakw Kice Manito, e nataweritak kitci miroparihitoekw kirika wir. Ohwe nimikw kata macikowitakaniwon mitcet iriniwok otci. <sup>25</sup>Tapwe ohwe ka iteian, nama wiskat aci ni ka minikwan minicapo, patoc minawatc minikweiane ocki minicapo neta Kice Manito Okimawinik.»

<sup>26</sup>Minawatc ki nakamowok mirwatatamo nakamowiniw. Mina tca ki matcawok, matinacik Mont des Oliviers ka icinikaterik e icatcik.

### **E nikan witak Cecoc kitci itikotc Piena aka e kiskerimikotc**

*(Natawapata kaie Matt 26.31-35; Luc 22.31-34; Jean 13.36-38)*

<sup>27</sup>Aci itew Cecoc anahweriw owitcewakana: «Kaskina e taciekw ki ka pakiteriminawaw. Masinatew meka Kice Manito Omasinahikanik:

‘Ni ka nipahaw maritcenici iriniw.

Kaskina tca wiew kata orackawok maritcenicak.’ »

*Zacharie 13.7*

<sup>28</sup>Minawatc kiapatc itew Cecoc: «Ickwa apitcipaiane, nete Galilée askik ni ka ican kitci pehitakok.»

<sup>29</sup>Aci itew Pien: «Misawatc kaskina aniki pakiterimiskawe, nama ni nin ki ka pakiterimitin.»

<sup>30</sup>Aci itiko Cecoca: «Tapwe ohwe ka witamatan, anotc ke mi kicikak, tipiskake tca, epwamoci nicwaw kitotc pakahakwan, kir aci nictowaw ki ka ickwa itan aka e kiskerimiin.»

<sup>31</sup>Aric Pien itew kiapatc kirawe e kiciwetc: «Nama wiskat ni ka itan aka e kiskerimitan, misawatc kecpin acteke kitci nipoian kirika kir.»

Ekoni peikon kaskina ka iteritci anihi kotakihi Cecoc owitcewakana.

### **Gethsémané pitowatikw e nta aiamihatc Cecoc**

*(Natawapata kaie Matt 26.36-46; Luc 22.39-46)*

<sup>32</sup>Aci iti takocinok nete Gethsémané pitowatikw ka icinikaterik.<sup>l</sup> Aci itew Cecoc anahweriw owitcewakana: «Ekota ota apikw. Nin tca ni ka nta aiamihan.»

<sup>33</sup>Minawatc ki matceworew anihi Piena, Cak kirika Jean. Aci ki iti micta arimeritam kirika e micta nekateritak. <sup>34</sup>Ki itew owitcewakana: «Ni micta kice kackeriten nitehik. Ekota ota taciekw. Akawir kaie notekocikw.»

---

<sup>l</sup> 14.32 Ekota neta e ici mictikoskak, «oliviers» e icinikatakaniwitcik aniki mictikok.



*Matinacic, Mont des Oliviers ka icinikatek*

<sup>35</sup>Minawatec nakewara iti icaw. Ki nipiskopariho e aiamihatc, e pakoserimotc aka kitci iciwepasitc kitci micta nekatcitatc.

<sup>36</sup>Aci itepan: «Notawi, kaskina kir ki kackitan. Ocita tca aka kitci nekatcitaian. Nama aric nin nititeritamowin kitci apatak, aric kir kititeritamowin.»

<sup>37</sup>Aci natawapamew minawatec anahweriw owitcewakana. Ki tca wapamew e taci niparitci. Aci itew Piena: «Simo, ki nipan a ni? Nama a wawatec ki ki otci kackitan peikwo tipahikan irikik aka kitci nipain? <sup>38</sup>Nanakatisikw! Pakoserimokw aka kitci cakotcihikoiekw e kokwetcihikoiekw. Nataweritam ko iriniw omitoneritcikanik kitci miro totak. Nama aric mocak kackitaw. Nama meka mackowisimakaniw owiaw.»

<sup>39</sup>Aci minawatec nakatew owitcewakana anahwe Cecoc, peikon tca kiapatc e itetc e aiamihatc. <sup>40</sup>Ka natawapamatec minawatec owitcewakana, kiapatc nipariwa. Nama ki otci kackitaripana kitci aitapiritci. Nama aci kiskeritamiriwa ke itikotc.

<sup>41</sup>Nac nictowaw ki natawapamew. Aci itew: «Kiapatc a ki nipanawaw? Kit arwepihitisonawaw a? Ekoni aci, kanawapata-mokw! Aci otcitciparin kitci pakiterimakaniwitec Iriniw Okosa,<sup>m</sup> iriniwok ka micta pactatitcik kitci makonatcik.

<sup>42</sup>Pasikokw. Matcatan aci. Kanawapamakw sa anahwe iriniw ka pakiterimitc. Aci takocin.»

### **E makonakaniwitec Cecoc**

*(Natawapata kaie Matt 26.47-56; Luc 22.47-53; Jean 18.3-12)*

<sup>43</sup>Mekwata kiapatc e taci arimwetc Cecoc, aci pe takociniriw iriniwa, peikw anihi owitcewakana Cecoc, Judas ka icinikasoritci. Anahwe Judas micta mitcet iriniwa pe witcewiko, mictikoriw e pe takonamiritci kirika omicta omokomaniwaw. Ki pe iciticohokowakopan anahweriw ka tiperimaritci cota mekotewokoreriw acitc ka kiskinohamakeritci cota aiamihe irakonikewiniw kaie cota aiamihe okimawa. <sup>44</sup>Judas, anahwe ka pakiterimatc Cecoca, ki itepan anahweriw iriniwa ka ki pe witcewikotc ke totak kitci ki otci kiskerimaritci Cecociriw, e ki itatc: «Anahwe iriniw ke otcemak, enko na ka natawerimekw. Makonakw tca. Wewerita kaie nanakatcihakw matceworekwe.»

<sup>45</sup>Tekocik anahwe Judas, ki natawapamew Cecoca e tca itatc: «Okimaw.»

Minawatc ki otcemew.

<sup>46</sup>Tecikotc aniki kotakihik ki makonewok Cecoca. <sup>47</sup>Peikw tca nta ka tacikespan ki korokopitam omicta omokoman. Ki otamitotowew kice mekotewokorewa otarotakaniw. Ki tca kickitokehepohew. <sup>48</sup>Aci itew Cecoc: «Actepan a kitci pe icaiekw kirika kimicta kimokomaniwawa acitc kimictikomiwawa kitci ki makoniekw, mitowi kecpin ka matci totak e kimotitc e iterimiekw? <sup>49</sup>Tato kickwa ki ki wapaminawaw e kiskinohamakeian nete kitci aiamihe mikiwamik. Nama aric wiskat ki ki otci makoninawaw. Anihe tca anotc ka totowiekw, iciwepan aci kitci ki isparik anihe ka masinatek Kice Manito Omasinahikanik.»

<sup>50</sup>Aci kaskina pakiterimiko owitcewakana. Ekoni ka ici ocimoritci.

<sup>51</sup>Peikw ockinikiw mi nosanehwepan Cecoca, tepirak wapowaniw e wikwekitc. Ki kotci makonakaniwiw. <sup>52</sup>Ekoni ka ici nakatcipatatc aniheriw owapowan e tca ocimotc e cacakarikatepatatc.

### **E iciworakaniwitec Cecoc neta ka ici mawotcihitotcik ko ka tipaskoniketcik cota iriniwok otci**

*(Natawapata kaie Matt 26.57-68; Luc 22.54-55,63-71; Jean 18.13-14,19-24)*

<sup>53</sup>Kice mekotewokorek ki iciworewok Cecoca, nete ka ici mawotcihitotcik ko ka tiperimatcik cota mekotewokorewa kaie cota aiamihe okimawok kirika ka kiskinohamaketcik cota aiamihe



irakonikewiniw. <sup>54</sup>Warawik otci nosowapamew Cecoca anahwe Pien. Ki tca icaw nete kice mekotewokorewa omikiwamirik. Orowitimik pa tacikew kirika cimpanica, kaie tca e papa awasotc.



*Ka tipaskoniketcik cota iriniwok otci*

<sup>55</sup>Aniki ka tiperimatcik cota mekotewokorewa kaie kaskina kotakihik ka tipaskoniketcik cota iriniwok otci nantowapata-mowakopan kitci itactahorakaniwiritci Cecoca, ke ki otci atamerimakaniwiritci kitci tca nipahakaniwiritci. Nama aric ki otci miskamok. <sup>56</sup>Mitcet iriniwok itactahorepanak Cecoca e kiraskitcik kitci atamerimakaniwiritci. Aric osam papitoc aitewakopan e arimwetcik. <sup>57</sup>Aci atita pasikowok e tca itetcik: <sup>58</sup>«Ni ki petowanan e itetc, 'Ni ka orahen ohwe kitci aiamihe mikiwam, iriniwok ka ki ocitatcik. Kotak tca ni ka ocitan, nicto kickwa irikik kitci tacikaman. Namaiew ni aric iriniwok ke ocitatcik aniheriw.'»

<sup>59</sup>Aniheriw aric ka itetcik, papitoc kiapatc aitewakopan.

<sup>60</sup>Aci pasiko anahwe kice mekotewokorew, nete nikanik e micta mitcetinaniwonik, e tca kokwetcimatc Cecoca, e itatc: «Nama a kekocic kit itan? Nama a ki petamwan aniheriw ka itetcik aniki iriniwok e arimomiskik?»

<sup>61</sup>Nama aric ki otci naskamo Cecoc. Tekaci nama kito. Aci kiapatc kokwetcimiko anihi kice mekotewokorewa: «Kir a ni Kice Manito Okosa, anihi ka ki itetc kitci pe iciticohwatc kitci

akwacimiweritci, anahwe mocak ka mirwatcimakitc e aiamihaiak?»

<sup>62</sup>Cecoc itew: «Ehe, nin ni. Kaie kaskina e taciekw ki ka wapamawaw Iriniw Okosa<sup>n</sup> e apitc onihwinik Kice Manito ka micta mackowisitc, kirika ki ka wapamawaw oskok e pe ototetc.»

<sup>63</sup>Ekoni e ici pikopitak anahwe kice mekotewokorew okapoto-wan, e tca itetc: «Nama aci awocamec ki ka irapatcihanowok aniki iriniwok papitoc ka aitetcik. <sup>64</sup>Aci wir tipirawe ki ki petowawaw e ici arimwetc, e marerimatc Kice Manitowa. Tan tca e iteritamekw?»

Kaskina ki atamerimewok Cecoca kirika e itetcik kitci nipahakaniwiritci.

<sup>65</sup>Atita neta e tacitcik, ekoni e ici kitciparitcik e iskwataticik.<sup>o</sup> Ki akonakwenehwewok. Eko tca e ici otatamohwatcik, e tca itaticik: «Awin tca icka ka ki totask?»

Ki tca makonewok aniki cimakanicak kirika tca e ki macikowaticik.

### **Pien e itetc: «Nama ni kiskerimaw Cecoc.»**

*(Natawapata kaie Matt 26.69-75; Luc 22.56-62; Jean 18.15-18,25-27)*

<sup>66</sup>Pien kiapatc pa tacikepan orowitimik neta kice mekotewokorew omikiwamik, aci ka pe takociniritci peikw iskwewa, kice mekotewokorewa ka atoskectowatc. <sup>67</sup>Ki wapamew anihi Piena e pa awasoritci. Wewerita ki kanawapamew, e tca itatc: «Katie kir ni, ki pa witcewatai anaha Cecoc, Nazareth ka otcitc!»

<sup>68</sup>Aci kaso anahwe Pien, e itetc: «Nama ni kiskeriten! Nama ni nisitoten wa itein.»

Ekoni ka iti icatc pecotcik nete ka ici pitakaniwonik ickwatemik. Aci mate kito pakahakwan. <sup>69</sup>Aric ki wapamiko anihi iskwewa. Ekoni kiapatc e itaritci neta ka tacikeritci: «Anahwe iriniw, katie wir ni witcewepan anihi Cecoca.»

<sup>70</sup>Kiapatc kaso Pien e itetc: «Nama ni kiskerimaw.»

Nama kinec aci minawatc itiko Pien anahweriw iriniwa neta ka tacikerispana: «Tapwe katie kir peikw Cecoc owitcewakana. Galilée askik meka katie ki otcin.»

---

<sup>n</sup> 14.62 Arimomitiso ota Cecoc.

<sup>o</sup> 14.65 Kekotc: e sikowataticik (M)

<sup>71</sup>Aci itew Pien: «Kecpin kiraskiwanen, ni natawerimaw Kice Manito kitci pasakactehwite. Tapwe ohwe ka iteian, nama ni kiskerimaw anaha iriniw ka arimomekw.»

<sup>72</sup>Mia ka ickwa itetc aniheriw, aci minawate kito pakahakwan. Ekoni nicwaw e kitote. Aci mikawiw Pien aniheriw ka ki itikote Cecoca: «Epwamoci nicwaw kitote pakahakwan, aci nictowaw ki ka ickwa itan aka e kiskerimiin.» Aci iti micta mato.

### **Kice okimak e iciworakaniwite Cecoc, Pilate ka icinikasoritci**

*(Natawapata kaie Matt 27.1-2,11-14; Luc 23.1-5; Jean 18.28-38)*

**15** <sup>1</sup>Wipate e kice wapanik ki mawotcihitowok aniki ka tiperimatcik cota mekotewokorewa, cota aiamihe okimawok, ka kiskinohamaketcik cota aiamihe irakonikewiniw acite kaskina ka tipaskoniketcik cota iriniwok otci, kitci arimotakik ke totowatecik Cecoca. Ki itewok kitci takopitakaniwiritci. Ki tca matceworakaniwiriw, nete e iciwotowakaniwiritci kice okimak, Pilate ka icinikasoritci.

<sup>2</sup>Aci wir anahwe Pilate kokwetcimew Cecoca: «Kir a cota iriniwok okimamiwawa?»

Aci itew Cecoc: «Mia kit itan.»

<sup>3</sup>Mitcet kekociciriw itactahorepanak Cecoca aniki ka tiperimatcik cota mekotewokorewa. <sup>4</sup>Aci minawate kokwetcimew Pilate Cecoca: «Nama a ki kiton? Ki petowawok a? Mitcet kekociciriw kit itactahorikok!»

<sup>5</sup>Nama awocamec ki otci kito Cecoc. Ki mamiskaterimiko tca anihi Pilate aka e naskamote.

### **Cecoc e anwerimakaniwite kitci nipote**

*(Natawapata kaie Matt 27.15-26; Luc 23.13-25; Jean 18.39-19.16)*

<sup>6</sup>Tatwaw e micta aiamihe makocaniwok, Pâque ka icinikatek, anahwe kice okimaw Pilate pakitinepan ko peikw iriniwa mekwata e kipohwakaniwiritci. Wirawaw tca ko iriniwok itakaniwakopan kitci orapamatcik awiriw mia ke pakitinakaniwiritci. <sup>7</sup>Takopan nta peikw iriniw e kipohwakaniwite. Barabbas icinikasopan. Kotakihik matci iriniwok kaie wirawaw tacikewakopan neta kipohotowokamokok ka ki manohotcik mekwata e kotci cakotcihatcik kice okimawa. <sup>8</sup>Micta mitcet ki icawok iriniwok nte Pilate omikiwamik, e tca nta natawerimatcik kitci pakitinakaniwiritci awiriw, mia ko e totcikaterik wirawaw otci.

<sup>9</sup>Aci itew Pilate: «Ki nataweritenawaw a kitci pakitinak anihi okimamiwawa cota iriniwok, kirawaw otci?»


<sup>10</sup>Kiskeritamokopan meka Pilate e asawakeritakik aniki ka tiperimatcik cota mekotewokorewa.<sup>p</sup> Ekoni wetci ki pakiterimatcik Cecoca kitci makonakaniwiritci. <sup>11</sup>Aric ki cikimewok neta kaskina iriniwa ka tacikeritci kitci nataweritamowaritci kice okimariw Pilate, Barabbas wir kitci pakitinakaniwitc. <sup>12</sup>Aci minawatc Pilate kokwetcimew anihi iriniwa e micta mitcetiritci: «Kekwan ka nataweritamekw kitci totowak anahwe ka icinikatekw ‘cota iriniwok okimamiwawa’?»

<sup>13</sup>Aci itewok e tepitepwetcik: «Tcistaskowaci tcipaiatikok!»

<sup>14</sup>Aci kokwetcimew Pilate: «Kekwan tca? Tan ani ka ki ici patahak?»

Atcikotc kirawe kiciwewok e itetcik: «Tcistaskowaci tcipaiatikok!»

<sup>15</sup>Pilate ki pakitinew anihi Barabbas, e wi mireritamihatc anihi iriniwa e mitcetiritci, kaie ki itew anahweriw cimakana kitci pasakactehwaritci Cecociruw kirika kitci tcistaskowatakaniwiritci tcipaiatikok.



*Romain cimakanicak*

<sup>p</sup> 15.10 Kekotc: e asawakeritakik osam e micta nosanehwakaniwiritci Cecoc

### **Cimakanicak e papirotowatick Cecoca**

*(Natawapata kaie Matt 27.27-31; Jean 19.2-3)*

<sup>16</sup>Minawatic aniki cimakanicak iciworewok Cecoca kice okimaw omicta omikiwamik. Kaskina tca wicamewok owitc cimakaniciwawa. <sup>17</sup>Kapotowaniw e mikwekacinik ki piskamotarewok Cecoca.<sup>q</sup> Minawatic ki apikatamok minesikaciriw,<sup>r</sup> Cecoca octikwanirik e actamowatick. <sup>18</sup>Ekotca e ici kicterimakasotcik e itatick: «Kwei cota okimaw!»

<sup>19</sup>Micta mitcetwaw ki otatamohwewok octikwanirik, mictikociriw e totakik, kaie ki iskwatewok. Kirika tca ki micta nipiskoctowewok, kiapatc e kicterimakasotcik. <sup>20</sup>Ka ickwa papirotowatick, ki maninamowewok aniheriw kapotowaniw e mikwekacinik. Wir tipirawe owikasimiriw tca ki piskamotarewok. Minawatic ki orowitahewok neta kice okimaw omikiwamirik kitci tca nta tcistaskowataatick tcipaiatikok.

### **Tcipaiatikok e tcistaskowatakaniwitic Cecoc**

*(Natawapata kaie Matt 27.32-44; Luc 23.26-43; Jean 19.17-27)*

<sup>21</sup>Tapan nte peikw iriniw, Cyrène otenak ka otcitc. Simo icinikasopan, Arikisan<sup>s</sup> kaie Rufus otawiwawa. Mia pimotekopan



*Minesikaciriw e actakaniwonik Cecoc octikwanik*

<sup>q</sup> 15.17 Icinakonikopan mitowiriw aniheriw kapotowaniw weckatc okimawok ka apatcitawakopan.

<sup>r</sup> 15.17 Enko na mictikocic ka kawak.

<sup>s</sup> 15.21 Alexandre



neta, nte e ototetc okitikan askik. Aci ki itiko anahweriw cimakana otcitakotc kitci miworatc Cecoca otcipaiatikomiriw. <sup>22</sup>Cecoc iciworiko cimakana nete matinacik Golgotha ka icinikaterik. Wi itemakan anihe Golgotha, Octikwanikekan. <sup>23</sup>Aci nta wi minihewok minicaporiw, kirika mackikiriw e ki actakaniwonik, «la myrrhe» ka icinikaterik. Nama aric ki otci minikwew Cecoc.




Nipic, «la myrrhe» ka icinikatek

<sup>24</sup>Ki tcistaskowatewok tcipaiatikok aniki cimakanicak. Minawatc owikasimiriw ki tetawinamatowok kirika ki metowewok kitci kiskeritakik anahwe ke kanewitc aniheriw wikasiriw. <sup>25</sup>Cakitato tipahikanearipan e kicepawonik ka tcistaskowatatcik neta tcipaiatikok. <sup>26</sup>Napakitikwatikocik masinateripan wetci ki anwerimakaniwitc Cecoc, ohweriw e itasinaterik: «Cota iriniwok okimamiwawa». <sup>27</sup>Nicw kimoti iriniwok kaie wirawaw ki tcistaskowatakaniwiwok otcipaiatikomiwak, waopimera Cecoc ka ici tcistaskowatakaniwitc, peikw onihiwiniw, kotak onamitciwonik. [<sup>28</sup>Aci tca ki ickwa pimotemakan ka itemakak Kice Manito Omasinahikanik: «Mitowi matci iriniw ki aitotowakaniwiw.»]<sup>t</sup>

<sup>29</sup>E pimotetcik nta iriniwok wepiskoweparihowok e marerimatcik kirika e itatcik: «Kir ka ki itein kitci orahaman kitci aiamihe mikiwam, minawatc tca kitci ocitain, nicto kickwa tca tepirak kitci tacikaman. <sup>30</sup>Ocimohitiso tca kir tipirawe. Nitatowi neta kitcipaiatikomik!»

<sup>t</sup> 15.28 Nama takon ohwe atita weckatc masinahikanik.



*E tcistaskowatakaniwitec Cecoc*

<sup>31</sup>Peikon kaie wirawaw ka tiperimatcik cota mekotewokorewa kaie ka kiskinohamaketcik cota aiamihe irakonikewiniw marerimewok Cecoca, e itaticik: «Ki wikotcihew kotakihi iriniwa, nama aric kackitaw kitci wikotcihitisotc. <sup>32</sup>Kecpin tapwe anahwe Kice Manito ka ki itetc kitci pe iciticohwatc, kecpin tapwe Israël okimaw, kata kackitapan kitci nitatowitec neta tcipaiatikok. Kecpin wapatamake anihe, aci nta ni ka tapwerimanan.»

Aniki kaie ka nicitcik kimoti iriniwok ka ki tcistaskowatakaniwitec, kaie wirawaw marerimewakopan Cecoca.

### **Ka nipotc Cecoc**

*(Natawapata kaie Matt 27.45-56; Luc 23.44-49; Jean 19.28-30)*


<sup>33</sup>Ka apita kicikak tekaci ki tipiskaw kaskina wiew, nac nicto tipahikan e ickwa apita kicikak. <sup>34</sup>Ka nicto tipahikanearik, ki micta tepwew Cecoc e kiciwetc:

«Éloi, Éloi, lema sabactani?»

Wi itemakan anihe:

«Nikice Manitom, Nikice Manitom!

Kekwan wetci ki pakiterimiin?»



*E tcistaskowatakaniwitec Cecoc,  
kirika nicw kimoti iriniwa waopimera e tcistaskowatakaniwiritci*

<sup>35</sup>Atita aniki ka tacikewakopanen ki petowewok aniheriw e iteritci. Aci tepwewok e itetcik: «Natotamokw, Eliwa ka tepwatatc!»<sup>u</sup>

<sup>36</sup>Aci peikw nta e tacitcik tecikotc nta natcipataw pakiwaniciriw,<sup>v</sup> pinekinapok e ki kitanak.<sup>w</sup> Onoskotc mictikok ki akokataw, e itinamowatc tca Cecoca kitci minikweritci, e tca itetc: «Aka patama, ki ka tca wapamano ke apitc pe nitinikokwen otcipaiatikomik anihi Eliwa.»

<sup>37</sup>Aci ki micta notakosiw Cecoc. Ekoni ka iti nipotc.


<sup>38</sup>Mia ni apitc nete kitci aiamihe mikiwamik micta akwekahanekin ki tetawoparin. Tekaci rarikiparin. Icpimik nte ki otci kitciparin, nac nte nitc. <sup>39</sup>Ka tiperimatc Romain cimakanica nte itactamikapowipan Cecoca otcipaiatikomirik. Ki wapamew ka ispariritci Cecoca e niporitci. Ki tca itew: «Anahwe iriniw, tapwe ni Kice Manito Okosa!»

<sup>40</sup>Atita iskwewok nete pa tacikewakopan, warawik e otapiketcik. Peikw anahwe, Mari, Magdala otenak ka otcitc, tacikepan nte, kaie kotak Mari (okawiwawa Cak, anahwe «ka ocki matisitc» ka

<sup>u</sup> 15.35 Eli [Élie], enko anahwe peikw weckatc ka ki pe nikan tipatcimotc Kice Manito otci.

<sup>v</sup> 15.36 Mia itemakan e emitikocictek: une éponge

<sup>w</sup> 15.36 Minicapo aka ka misakitakok, kekat mia pinekinapo e ispokok.



*Micta akwekahikanekin e tetawoparik kitci aiamihe mikiwamik*

icinikatakaniwikopanen ko, kirika Joses) kirika tca Sarome.<sup>x</sup>

<sup>41</sup>Galilée askik ki otcí pe nosanehwepanak Cecoca e atoskecto-watick. Micta mitcetipanak kotakihik iskwewok kaie wirawaw ka taciketcik e ki pe witcewakopanen Cecoca, Jérusalem otenak e icaritci.

### **Ka nahikowakaniwitic Cecoc**

*(Natawapata kaie Matt 27.57-61; Luc 23.50-56; Jean 19.38-42)*

<sup>42-43</sup>E iti otakocinik, aci takocin peikw iriniw, Sosep e icinikasotc, Arimathée otenak ka otcitc. Micta kicterimakaniwipan anahwe Sosep, nte ka ici apitc ka kitci tipaskoniketcik cota iriniwok otcí ka ici apitcik. Asperimopan kaie wir kitci takociparinik Kice Manito Okimawiniw. Aci aniheriw e kicikarik epwamoci arwepiw kicikarik, aniheriw e kicikarik e nisawitcik ko cota iriniwok kitci aiamihatcik, ekoni ka icatc anahwe Sosep kice okimak, Pilate. Nama ki otcí cakwerimo e nta nataweritamowatc aniheriw Cecoca owiawiriw.

<sup>44</sup>Aric ki kockomakaniwiw anahwe Pilate e petaketc aci e nipo-ritci. Ki tca wicamew anihi ka tiperimaritci cimakánica, e kokwe-tcimatc e apitc tapwe ki nipo-ritci Cecociriw. <sup>45</sup>«Ehe,» ki itiko



cimakanica. Ki tca itew kitci mirakaniwiritci Sosepa aniheriw Cecoca owiawiriw.

<sup>46</sup>Aci pakiwaniciapiw ki otapinam anahwe Sosep. Minawate ki nta nitinam tcipaiatikok Cecoca owiawiriw. Ki wikwekinam ocki pakiwaniciapirik. Minawate mitikowocik ki nta nahikam, asinik e ki ocitakaniwonik. Micta asiniwa ki tetipiwepinew kitci kipitinik aniheriw mitikowociriw. <sup>47</sup>Anahwe Mari, Magdala otenak ka otcitc, kirika kotak Mari, Joses okawiwa, kanawapikewakopan e nahikowakaniwiritci Cecoca.

### **Ka apitcipate Cecoc**

*(Natawapata kaie Matt 28.1-8; Luc 24.1-12; Jean 20.1-10)*

**16** <sup>1</sup>Ka ickwa arwepiw kicikarik, aniki iskwewok e nictitcik (Mari, Magdala otenak ka otcitc, acitc Mari, Cak okawiwa, kaie Sarome) ki nta otapinamok pimiteriw ka miromakonik, e wi ciconamowatecik Cecoca owiawirik e ickwa niporitci. <sup>2</sup>Wipate kicep e manactakaniwonik, kotc e nokosiritci pisimwa, matcawakopan, nete e icatcik rikwaskanik. <sup>3</sup>Aititowakopan: «Awin ke tetipinate anihi asiniwa neta nikanik ka apiritci, kitci ki pitakeikw?»

<sup>4</sup>Tekocikik nete, aci wapamewok e ki tetipinakaniwiritci anihi asiniwa ka micta micapiskisiritci. <sup>5</sup>Ekoni e ici pitaketcik neta ka ki ici arakaniwirispana Cecoca. Wapamewok neta ockinikiwa e wapekahaceritci, onihiniwak aniki iskwewok e taci apiritci. Micta sekisiwok. <sup>6</sup>Aci itew anahwe ockinikiw: «Aka sekisikw! Anahwe ka nantowapamekw, Cecoc, Nazareth ka otcitc, ka ki tcistaskowatakaniwite tcipaiatikok, nama ni aci ota tacikew. Ki apitcipaw ni aci! Kanawapatamokw kotc! Ekota ota ka ki ici arakaniwispan. <sup>7</sup>Natawapamakok tca Pien kirika aniki kotakihik Cecoc owitcewakana. Ki ka tca itawawok, 'Aci Cecoc ki nikanickakowaw, nete Galilée askik itekera. Ekote nete ke ici wapamekw, mia ka ki itespan.'»

<sup>8</sup>Aci orowiwakopan neta rikwaskanik aniki iskwewok. Ocimowakopan. Micta ninikipariwakopan, e micta sekisitcik. Nama otci papamatisokewakopan, osam e micta sekisitcik.

### **Mari, Magdala otenak ka otcitc e wapamate Cecoca**

*(Natawapata kaie Matt 28.9-10; Jean 20.11-18)*

[<sup>9</sup>Ka ickwa apitcipate Cecoc wipate e kicepawonik ka manactakaniwonik, aniheriw totam nictam kitci wapamikotc



Mariwa, nte otenak Magdala otenak ka pe otcirispana. (Enkweriw anihi iskwewa ka ki witcihaspan, nicowaso (7) matci awihawiciriw e ki orowitica hamowatc.) <sup>10</sup>Anahwe Mari ki nta witamowew anahweriw iriniwa ka ki pa witcewaritci Cecociriw. Micta kackeritamopanak kaie matopanak. <sup>11</sup>Kotc ka petowatcik ani e aiteritci Mariwa, kiapatc e pimatisiritci Cecociriw, kaie tca e ki wapamaritci, nama ki otci tapwetowewok anihi iskwewa.

### **E totak Cecoc kitci wapamikotc nicw owitcewakana**

*(Natawapata kaie Luc 24.13-35)*

<sup>12</sup>Minawatc Cecoc ki totam pitoc kitci icinakositc e wapamikotc nicw owitcewakana, mekwata e icaritci kitikan askik itekera.

<sup>13</sup>Minawatc ki kiwewok e nta witamowatcik anihi kotakihi Cecoc owitcewakana. Nama kaie wirawaw ki otci tapwetowakaniwiwok.

### **Aci Cecoc e totak kitci wapamikotc anihi mitato acitc peikw e taciritci owitcewakana**

*(Natawapata kaie Matt 28.16-20; Luc 24.36-49; Jean 20.19-23; Actes 1.6-8)*

<sup>14</sup>Mekwata tapickotc e mitcisotcik Cecoc owitcewakana, kek ki otci nokosiw Cecoc. Ki itew anahweriw otirinima: «Kekwan wetci aka ki otci tapwetowiekw? Kekwan wetci ki micta mackoteheiekw, aka kitci tapwetowekok aniki ka ki wapamitcik ka ickwa apitcipawak?»

<sup>15</sup>Minawatc ki itew Cecoc: «Kaskina e irikokoskamikak pa icakw, Miro Tipatcimowin kitci tipatcimoiekw, kaskina awik kitci petak.

<sup>16</sup>Kaskina awik ke tapwerimitc kirika ke sikahatasotc kata akwacimakaniwiw. Aric anahwe aka ke tapwerimitc kata anweritakosiw.»

<sup>17</sup>«Ekoni ke otci kiskerimakaniwitcik aniki ka tapwerimitcik: Kata orowiticohwewok matci awihawica, niticinikasowiniw kitci apatcitatcik. Ocki arimwewiniw kata arimwewok. <sup>18</sup>Kecpin takonatawe kinepikwa ka matci mackikiwiritci kirika kecpin matci mackikiriw minikwetawe, nama wiew kata ispariwok. Kata takinewok awiriw ka akosiritci, kata miro matisiriw.»

### **E opickatc Cecoc**

*(Natawapata kaie Luc 24.50-53; Actes 1.9-11)*

<sup>19</sup>Ka ickwa ni ici aimihatc otirinima Teperitciketc Cecoc, ki opickaw, wakwek e icatc. Ki nta witapimew Kice Manitowa. Onihiwinik ki ici apiw. <sup>20</sup>Ki matcawok aniki Cecoc owitcewakana

kaskina wiec e nta tipatcimotcik miro tipatcimowiniw. Ki witci-hikowok Teperitcikeritci ani e ici otamirotcik. Ekota ni ka otci kiskeritcikaterik tapwe e ki pe mirikotcik okiskinohamakewiniw, e ki tca mirikotcik kaie kitci mata kackitatcik.]<sup>y</sup>

---

y 16.20 Anihe ka tatosinatek versets 9 nac 20 nama takon mitcet weckate masinahikanik, atita tepirak.